

研經室集五









研
手
經
室
集
五

阮
元
著



中
華
書
局



聖經室二集卷一目錄

皇上八旬萬壽宗經徵壽說

御試擬劉向請封甘延壽陳湯疏并陳今日同不同

誥授昭勇將軍廣東欽州營遊擊

誥贈資政大夫晉光祿大夫戶部侍郎王考琢庵太府君行狀

誥封光祿大夫戶部左侍郎顯考湘圃府君顯妣一品夫人林夫人行狀

誥贈昭勇將軍高祖孚循太府君行述

四世祖妣厲太恭人傳

卷二

雷塘阮氏墓圖記

北湖公道橋阮氏墓圖記

雷塘阡表

雷塘阮公樓石刻象記

揚州阮氏家廟碑

揚州隋文選樓記

揚州文樓巷墨莊考

蜀州北湖小志序

淮安大河阮氏世系記

林清泉公傳

節孝林母傳

李晴山喬書西二先生合傳

胡西琴先生墓誌銘

劉端臨先生墓表

浙儒許君積卿傳

安徽巡撫裴山錢公傳

卷三

太傅體仁閣大學士大興朱文正公神道碑



誥授光祿大夫刑部右侍郎述庵王公神道碑

吏部左侍郎謝公墓誌銘

刑部侍郎唐山阮公傳

山東糧道淵如孫君傳

循吏汪輝祖傳

蔣士銓傳子知廉

卷四

壯烈伯李忠毅公傳

朱勇烈公傳

大竹縣知縣死事張君傳

福建布政使良吏李君傳

次仲凌君傳

通儒揚州焦君傳

李尙之傳



卷五

嚴忍公子餐方貽傳

順昌縣訓導伊君墓表

瑞州府學教授浦亭阮公墓表

翰林編修河東鹽運使司沈公旣堂墓志銘

默齋張君誄

知不足齋鮑君傳

武進臧布衣傳

孫頤谷侍御史傳

四川廣安州知州阮君墓表

誥封奉直大夫翰林院編修陳君墓志銘

誥贈中憲大夫山東兗沂曹濟兵備道一鳳孫公暨妻許恭人墓表

誥封奉政大夫掌陝西道監察御史歲貢生游君墓表

卷六



山東分巡兗沂曹濟道唐公神道碑銘

賜按察使銜河南開歸陳許兵備道柘田唐君墓志銘

江西銅鼓營同知劉君傳

贈承德郎翰林院庶吉士加一級例晉朝議大夫錢君暨配屠恭人墓志銘

詰封刑部山東司員外郎鄭君墓誌銘

童處士墓表

江都凌君傳

翰林院編修彭遠峯墓誌銘

臧拜經別傳

杭州府西海防同知路君墓志銘

誥封奉直大夫奉賢陳君墓表

武康徐母周孺人傳

朱母高太孺人傳

淨因道人傳

鮑姑辭敘

女壻張熙女安合葬墓碣

卷七

封泰山論

泰山志序

焦山定陶鼎考

金承安重刻唐萬歲通天史承節撰後漢大司農鄭公碑跋

知足齋詩集後序

蔽厓考古錄序

毛西河檢討全集後序

全謝山先生經史問答序

南江邵氏遺書序

王西莊先生全集序

于忠肅公廟題壁記

西湖謁經精舍記

金沙港三祠記

荊州窖金洲考

江隄說

廣州大虎山新建礮臺碑銘

通鑑訓纂序

史炤通鑑釋文跋

四史疑年錄序

寧波范氏天一閣書目序

卷八

奉敕撰熙朝雅頌集跋

恭注御撰味餘書室隨筆進呈後跋

浙江刻四庫書提要恭跋

瀛舟書記序

洋程筆記序

淮海英靈集序

廣陵詩事序

小滄浪筆談序

皇清碑版錄序

江蘇詩徵序

嘉慶四年己未科會試錄後序

兩浙輜軒錄序

兩浙輜軒錄補遺序

試浙江優行生員策問

己未會試策問

海運考跋

海塘肇要序

嘉靖搢紳冊跋

揚州府志事志氏族表圖說三門記

吳烈婦吞金紀事卷跋

吉蘭泰鹽池客難

致杭嘉湖道李坦書

嘉興嘉禾圖跋

飲川煮賑圖後跋

新修廣東通志序

恭進十三經注疏按勘記摺子

學經室二集卷一

皇上八旬萬壽宗經徵壽說

臣聞三極彝訓其書言經。經者堯舜禹湯文武周公孔孟之說。帝王稽古同天。聖德備焉。欽惟乾隆五十五年。皇上八旬萬壽。萬壽萬壽。臣仰思盛德大業。非三代以下史冊所可擬萬一。惟宗諸經傳。以徵聖壽。或管窺而得其詞焉。臣謹案。尙書洪範九五福。一曰壽。壽者福之初。福者德所致也。恭讀五福頌。以爲壽富諸事。皆受於天。惟好德修于人。五皇極曰。予攸好德。女則錫之福。皆五福主德之證。至哉聖人之德。卽福之基。聖人之所以壽也。帝王之壽。必本於天。書曰。天壽平格。孔安國傳曰。言天壽有平至之君。禮記中庸謂大德必得其壽。徵諸詩曰。保右命之。自天申之。我皇上昭事惟敬。書曰。敕天之命。惟時惟幾。恭繹讀召誥篇。一言以蔽之曰。曷其奈何弗敬。以誠民爲祈天之本。以敬德爲誠民之本。其理益明焉。大戴禮曰。戒愼必恭。恭則壽。又引丹書曰。敬勝怠者吉。亦其義也。皇上躬親郊壇大祀。極致精虔。其在周禮曰。大司樂。冬日至地上闕丘。夏至澤中方丘。祭法。燔柴於太壇。祭天也。瘞埋於泰折。祭地也。又以正月上辛祈穀。孟夏常雩者。公羊春秋曰。郊用正月上辛。月令。天子乃以元日祈穀於上帝。左氏春秋曰。龍見而雩。月令。大雩帝用盛樂。是也。社稷壇加玉者。祈農事也。周禮小宗伯掌建國之神位。右社稷。春秋外傳曰。玉足

以庇蔭嘉穀。朝日夕月諸中祀。茲復躬親一週。及於岳瀆。威命使祭告。禮記祭義曰。祭日於東。祭月於西。以別外內。周禮大宗伯以實柴祀日月星辰。以禋燎祀司中司命。飢師雨師。公羊春秋曰。祭大山河海。山川有能潤於百里者。天子秩而祭之。禮記王制。天子祭天下名山大川。五岳視三公。四瀆視諸侯。是也。定壇廟祭器者。周禮司尊彝。掌六尊六彝之位。禮記郊特牲曰。鼎俎奇而籩豆偶。法古制也。我朝聖聖相承。重熙累洽。百有餘年。皇上寅承丕基。無事不敬。法列祖。詩曰。下武維周。世有哲王。三后在天。王配于京。我國家創業東土。締造維勤。皇上編開國方略。以闡功德。書曰。惟先王建邦啟土。公劉克篤前烈。至於太王。肇基王跡。書薩爾濟戰事者。仁者無敵。受命伊始。書曰。壹戎衣天下大定。諭立臥碑。述太宗訓。守冠服騎射者。遵成憲也。詩曰。思輯用光。弓矢斯張。干戈戚揚。又曰。率由舊章。作紀恩堂前後記。敬誦實錄者。逮事聖祖。不忘恩教也。皇矣之詩。述文王逮事大王。大王受天命及王季文王。其詩曰。維此王季。帝度其心。又曰。克順克比。比於文王。四巡盛京。親製詩賦。以彰謨烈。詩曰。天作高山。大王荒之。彼作矣。文王康之。又曰。昭茲來許。繩其祖武。於萬斯年。受天之祜。

皇上上繩祖武。下詒孫謀。五代一堂。古今未見。復致王牒十一世之慶。爾雅曰。子之子爲孫。孫之子爲曾孫。曾孫之子爲元孫。元孫之子爲來孫。來孫之子爲暵孫。暵孫之子爲仍孫。仍孫之子爲雲孫。皇上明俊德。以親九族。恩澤深厚。禮記大傳曰。尊祖故敬宗。敬宗故收族。詩序曰。行葦。忠厚也。皇上勤於庶政。睿思

所周事立必豫。易乾象曰：天行健，君子以自強不息。書曰：一日二日萬幾。御書無逸篇，揭爲座銘。臣伏讀經筵御論，君子所其無逸，訓所爲處，與召誥王敬作所相發明。聖人之言，經訓所折衷也。法宮行在，皆秉燭待章。孟子曰：坐以待旦，視事移晷。傳餐嚮午，書曰：自朝至于日中，昃不遑暇食。內外奏章，皆丹毫親批，日數十事。周禮內史凡四方之事書內史讀之，皇上猶無須內史之讀也。內外臣工，日有召對，下至一命，亦無遺焉。周禮小臣掌三公及孤卿之復逆，大僕掌諸侯之復逆，宰夫敍羣吏之治，以待諸臣之復。萬民之逆是也。法祖六巡江浙，觀民察吏，不自暇逸。岱岳五臺豫河，皆親駐蹕。易曰：省方觀民設教。孟子曰：天子適諸侯曰巡狩，巡狩者巡所守也。禮記禮器曰：因名山升中于天。詩般序曰：巡狩而祀四岳河海也。天下庶獄，事必親覽。茲復恩詔減等，王制曰：刑者例也，例者成也。一成而不可變，故君子盡心焉。易曰：雷雨作解，君子以赦過宥罪。耕藉之禮，必躬親者，禮記月令：天子乃擇元辰躬耕帝籍。春秋外傳曰：民之大事在農，上帝之粢盛於是乎出，食爲民天。民爲國本，皇上愛民重農，民數穀數，要會時聞。周禮小司寇大比登民數，自生齒以上，登于天府。禮記王制：五穀皆入，然後制國用。周禮天府若祭天之司，民司祿而獻民數穀數，則受而藏之。至於祈謝雨澤，驛詢天下雨暘收穫，每霑足豐稔，必詩以誌喜。爾雅曰：四時和謂之玉燭，甘雨時降，萬物以嘉，謂之醴泉。穀梁春秋曰：五穀大熟爲大有年。又曰：閔雨者有志乎民者也，喜雨者有志乎民者也，正賦漕運歲千萬計，皇上臨御以來，免賦者三，免漕者再，茲復恩蠲天下正供，臣謹案。

周禮小司徒鄉師遂人遂師遂大夫皆有辨其施舍之事。鄭康成讀施爲弛。蓋周時什一雖輕皆無普免之事。豈若我皇上蠲貸至二十萬萬乎。臣伏讀經筵御論有孚惠我德以九五君位。惠卽我德。當置惠心于勿問。聖謨洋洋所以損上益下有孚元吉而說无疆也。偏隅偶歉。恩加蠲賑。截漕平糶。以劑盈虛。卹民也。周禮司稼以年之上下出斂法。均萬民之食。而調其急平其興。河防者民生所關。皇上命濬陶莊六塘。伊家諸河。清黃交匯。誌水宣洩。海塘建石。重隄保障。書曰。予決九川。距四海。濬畎潴。距川。考工記曰。以防水。禮記月令曰。完隄防。春秋外傳曰。陂障九澤。民閒五世同堂。二百餘家。壽逾百齡。同居十世。皆壽世人瑞也。爾雅曰。子子孫孫。引無極也。禮記曲禮曰。百年曰期頤。孝經曰。示之以禮樂而民和睦。

命重舉千叟宴者。皇建有極。斂福以錫庶民也。禮記王制曰。凡三王養老皆引年。周禮伊耆氏共王之齒杖。爾雅曰。黃髮。鬢齒。鮐背。壽也。皇上典學高深。文德淳懋。每歲必御經筵宣講。書曰。念終始典于學。抑戒之詩曰。抑抑威儀。維德之隅。臨雍講學。釋奠幸魯。崇儒重道也。禮記王制曰。天子曰辟廱。詩曰。於論鼓鍾。於樂辟廱。文王世子曰。天子視學。大昕鼓徵。乃命有司行事。興秩節。祭先師先聖焉。御製三老五更說。證以左氏孟子其義乃明。重排石鼓文者。存周法物。用光我文治武功也。詩車攻序曰。宣王復古也。吉日序曰。美宣王田也。御製詩五萬餘篇。文千餘篇。尙書帝庸作歌。易伏義畫卦。文王作卦辭。大戴禮曰。武王作機鑑璽帶十七銘。庶足擬焉。御書寶繪。咸臻極詣。論語曰。固天縱之將聖。又多能也。親定祭祀朝饗樂章。

及詩經樂譜。其在周禮大司樂大呂應鍾小呂夾鍾。皆歌以祀享。詩鹿鳴以燕羣臣。書曰詩言志。歌永言。聲依永。律和聲。卽其義也。鍾鐘特磬。列於大樂。御製笙詩。依義補辭。其在爾雅曰大磬謂之磬。大鐘謂之鏞。儀禮鄉飲酒燕禮諸儀。皆笙南陔華黍白華由庚諸篇。卽其義也。河源淮濟涇渭諸水。考厥源委。其在爾雅曰。河出崑崙虛。書曰導淮自桐柏。導沈水。東流爲濟。詩曰涇以渭濁。卽其義也。詔收天下遺書。分爲四庫。儲以七閣。其在周禮外史掌三皇五帝之書。鄭注所謂三墳五典也。皇上闢門籲俊。正科之外。六開恩榜。再舉制科。書洪範曰。俊民用章。詩卷阿序曰。言求賢用吉士也。皇上神武邁倫。嘗發廿矢。中十九。周禮射人。王以六耦射三侯三獲三容也。每歲秋。行圍木蘭蒙古進宴。所以詰武綏遠也。穀梁春秋曰。因蒐狩以習用武事。禮之大者也。詩時邁曰。薄言震之。莫不震疊。皇上奮武開疆。勘暴柔遠。蕩伊犁平回部。收金川定臺灣。爲亘古未有之功業。書序稱湯伐三臆。成王踐奄。皆不足比數。左氏春秋以禁暴戢兵保大定功安民和衆豐財爲七德。惟皇上武功備焉。至於先征而後歸服者。謂之歸降。回部緬甸是也。書曰帝乃誕敷文德。舞干羽於兩階。七旬有苗格也。不加征而自來歸者。謂之歸順。土爾扈特拔達山安集延痕都斯坦布魯特哈薩克巴勒布是也。書序曰。巢伯來朝。芮伯作旅。巢命巢遠國自來也。邇者安南王阮光平。八覲祝釐。則我皇上推亡固存。承天時行之道。大戴禮曰。重華南撫交趾。中庸曰。栽者培之。傾者覆之。海外遠國。若高麗暹羅琉球南掌皆入貢壽宇。不可縷計。爾雅曰。距齊州以南戴日爲丹穴。北戴斗極爲

空桐東至日所出爲太平西至日所入爲大蒙大戴禮曰海外肅慎北發渠搜氏羌來服是也。是惟我皇上大聖大仁允文允武用是承天純佑盛德日新登八衍範念用庶徵嚮用五福臣仰見庶徵之應本於五事寅恭對越爲壽之基此貌之恭作肅也惠澤優渥是可徵曰肅時雨若矣王言作則臣下稟令此言之從作乂也當陽用命是可徵曰乂時暘若矣克知灼見照謗幾先此視之明作哲也德化如春是可徵曰哲時燠若矣達聰兼聽參慮出謀此聽之聰作謀也凝成萬物是可徵曰謀時寒若矣精一執中廣淵齊聖此思之睿作聖也從欲風動是可徵曰聖時風若矣皇上臨御五十五年慶壽八旬由是推之萬萬年爲萬萬旬易策天數二十有五地數三十凡天地之數五十有五經卦皆八因而重之爻在其中二篇之策萬有一千五百二十自然之數也又萬壽年幹在庚爾雅曰太歲在庚曰上章庚猶堅強也章明也月躔在西西爲壽星之次爾雅曰壽星角亢也是生成推衍皆與苞符象曜相應故曰聖人之壽皆本於天錫羨延洪惟億萬年天保之詩臣下歸美崇尊頌福祿也曰詒爾多福曰受天百祿曰萬壽無疆猗歟盛哉聖壽之徵諸經者蓋遠邁皇王哉翰林編修臣阮元恭紀

御試擬劉向請封甘延壽陳湯疏并陳今日同不同

臣向疏邳支單于兼并外國日益強大數辱漢使者在廷諸臣未有爲陛下畫一策者都護延壽副校尉湯遠戍西域特發符節勒師旅直逼康居破其重城識名王斬閼支氏請縣首藁街夷邸以威遠服是沈

謀重慮。制勝萬里。師徒不勞。兵矢未折。功莫偉焉。而議者徒以湯矯制。不論其功。反欲文致之。是臣所未喻也。夫將在外。有可以振國威。制敵命者。專之可也。今延壽湯。不避死難。爲國雪恥。而竟無尺寸之封。其何以勸帥兵絕域者。昔李廣利之于大宛。曠日持久。靡敵師旅。僅獲數馬。功不敵罪。孝武猶且侯之。今郅支之功。當十倍于大宛。竟使致身之臣。未得封爵。且不免吏議。臣竊惜之。宜請釋其矯制之罪。賞其克敵之功。加以高爵。惟陛下察之。此劉向之疏意也。臣伏見我皇上奮武開疆。平定西域。拓地二萬餘里。凡漢唐以來。羈縻未服之地。盡入版圖。開屯置驛。中外一家。豈如郅支呼韓。叛服靡常。殺辱漢使哉。此其不同一也。我皇上自用武以來。出力大臣。無不加賞高爵。或有微罪。斷不使掩其大功。下至末弁微勞。亦無遺焉。絕未有若延壽等之有功而不封者。此其不同二也。我皇上運籌九重之上。決勝萬里之外。領兵大臣。莫不仰稟聖謨。指授機宜。有戰必克。閒有偶違廟算者。卽不能速藏豐功。又孰能于睿慮所未及之處。出奇謀。微幸立功者耶。此其不同者三也。

詔授昭勇將軍廣東欽州營遊擊詒贈資政大夫晉光祿大夫戶部侍郎王考琢庵太府君行狀

年家子胡長齡填諱

太府君諱玉堂。字履庭。號琢庵。始祖諱巖。當明神宗時。由江南淮安山陽遷揚州江都。明末遷居城北四十里湖中公道橋。二世祖諱國祥。例贈明威將軍。高祖諱文廣。任榆林衛正兵千戶。曾祖諱秉謙。以孫諱

匡衡公官。賚贈武德將軍。祖諱樞良。晉贈昭勇將軍。父諱時衡。誥封奉政大夫。晉贈昭勇將軍。凡五世。皆有隱德。至太府君生而倜儻。有志概。長身健臂。行止偉岸。與中人立。面僅及胸。少能挽強。馳射。矢無虛發。尤喜讀書。爲古文詞詩歌。援筆立就。康熙五十年辛卯。占籍儀徵鄉試。中式武舉人。主試者爲江蘇巡撫儀封張清恪公伯行。會劾奏本科文鄉試交通關節事。總督反奏。解巡撫職。遷之揚州館舍。太府君於是佩刀挾矢。護左右。同寢食。數月。及奉旨昭雪。復巡撫職。清恪公極感太府君之義。而太府君讀書勵行。一生清介。所以深得清恪公教者。亦多在此時矣。五十四年乙未。武會試中式。殿試三甲。賜同進士出身。分鑲藍旗教習。五十六年。五十七年。聖祖仁皇帝駕幸熱河。兩次隨扈。五十八年。授藍翎侍衛。雍正元年二月。蒙世宗憲皇帝賞緞三疋。三月。送聖祖仁皇帝梓宮。賞銀四十兩。八月。送太皇太后梓宮。加一級。本年癸卯科。殿試武進士。詔舉技勇馬箭步箭。皆稱旨。賞緞三疋。銀五十兩。十二月十三日。奉旨授三等侍衛。賞戴花翎。三年五月十八日。引見。外放湖北撫標中軍遊擊。兵部給都司簽書。管湖北撫標中軍遊擊。兼管左營事。及洩任。兼署右營。馭士嚴整。有律。五年八月。遭父喪。遵例在任奉諱。服除。十年三月。部議改設撫標中軍遊擊員缺。爲參將。經大將軍岳鍾琪以軍前才能之員。揀補。仍留軍前効力。太府君署理參將印務。十月。軍政卓異。十一年六月。引見。奉旨准其卓異。交部照例陞用。欽此。四月。以都司銜陞銜調補廣東提標後營遊擊。時巡撫德齡奏請以陞銜仍留湖北署撫標中軍印務。奉旨著照該撫所請行。欽此。雍

正十三年十一月。恭逢恩詔加一級。乾隆元年正月。兼署右營遊擊。三月中軍參將到任。交印卸事。旋署興國營參將。七月改署苗疆九谿營遊擊。二年。奉旨諭督撫。各據所知之人。秉公保舉。湖廣總督史貽直保舉阮某才守兼優。奏准紀錄一次。注册。五年五月。湖南城步綏寧兩縣。山內苗民數萬人。盤踞山谷。接辰州數百里。殺傷官兵。肆出劫掠。道路不通。奉檄領九谿澧州洞庭常德共四協營官兵。隨鎮軍鎮總兵劉策名夤夜掩勦。兵駐三界溪。苗悉精銳屯山口。因卽相度地勢。偵探賊情。六月六日。進攻薄賊寨。太府君身先士卒。遠施鎗礮。近接刀矢。斃賊甚多。賊大潰。遂乘勝奮殺。焚燒山寨。奪獲糧草器械。三界溪爲賊門戶。賊屯此爲最勦。自官兵大捷後。賊退保各寨。其勢遂分。提督軍門杜凱報捷。奉硃批。這所奏欣悅覽之。將士奮勇爭先。甚爲可嘉。俟事竣之日。從優議敘。欽此。閏六月初四日。攻八樹寨。克之。追殺數里。巢穴焚燬殆盡。七月二十二日。攻長安鹽井口。客寨。飛毛坪。龍家溪。竹林。各寨。皆次第克之。此五寨地勢險隘。林箐深密。太府君步行。率士卒冒矢石。敗其伏兵。鼓銳力戰。遂於一日中連克之。賊勢已大潰。因駐兵搜捕。山箐深密。焚燬茅蓬。發獲糧米甚多。是時上慮兵權未一。命貴州總督張廣泗。來湖南總制全軍。甫到城步。卽察知謀勇最著。資級二聯。勞獎極力。南山大箐屯賊正多。屢攻未克。張公令督各營兵進勦。賊積木石斷山路。兵不能入。太府君日率兵佯攻正道。探知間道。夜率健卒五百。攀藤越嶺而入。誤墜阮傷膝。流血滿足。以布縛膝。進益力。夜半及正道。微開木石。是時賊數千人。已覺來拒。烏鎗繩火。紛如亂螢。太府

君命兵負嵎偃伏。藤牌護前。賊至鎗齊發。我兵寂不動。賊易之。久乃鳴一大礮。鼓兵直下如建瓴。賊衆敗散。而正道兵無木石阻。亦大進合勦。殺獲甚多。及曉搜獲龍褲刀。標槍等器械及糧草無算。又搜得前被賊殺之巡檢官印一顆。賊餘黨共八百戶。退據南嶺。糧盡不支。閒出數十人。近營跪哭乞降。太府君察其誠。爲請於張公。張公云。設賊詐。汝當此咎耶。太府君以死任之。次日率賊衆近大營跪乞降。張公云。發三礮不畔去。乃真降耳。卽對衆發三大礮。斃數十人。餘衆股栗莫敢轉側。蓋感太府君拯護之恩。故忍死無負如此。張公於是始受降。是時各山賊寨亦並破。老幼退保入橫坡。八月二十二日。奉令領各營官兵相機督勦。張公又令遊擊區明李登華帶兵隨太府君進勦。橫坡山梁險隘。正路不能攻。九月二十八日。率官兵由左路奮登。奪殺前進。遂入寨中。鎗礮齊發。賊精銳殆盡。遂大敗。焚燬居室一空。生擒男婦子女二千餘人。賊寨盡平。十月初三初四日。復親督各營官兵于橫坡各山箐四面搜捕。生擒男婦子女千餘人。又搜獲窟室男婦數百人。刀杖銀帛無算。皆親解赴張公所。張公欲盡誅其生口。太府君再四諫阻。不從。不得已乃請曰。壯夫能執兵抗師者當殺之。其婦女及男子十六歲以下者。必宜赦免。張公始如所請。太府君出營。分別男女年歲。苗人環跪哭聲震山谷。先擇壯年有須者斬之。其餘全活。薙髮給以口糧。張公雅知賢能。不深求。仍獎勵有逾諸將。太府君奉令所剿之賊寨。前後十餘戰。皆謀勇並著。兵無少挫。功爲諸將最。攻戰少暇。卽賦詩校射以爲樂。各寨平後。徹兵回九谿營。總督班第具題。奉旨分別等次。交

部議敘。十一年，兵部議敘頭等軍功，加銜一等隨帶軍功，紀錄二次。八月，爲苗疆事宜保舉。十三年，推陞河南衛輝營參將。九月，蒞任。太府君之在九谿也，訓練勤而兵無虛額，賞重而罰嚴，故湖南勁旅，以九谿爲最。城綏之役，有兄弟皆爲兵，因母老例汰一人，兄弟爭出，母亦請二人皆從，而自役於署中。其有勇知方如此，及至衛輝，營務廢壞已極，兵貧而惰，弓矢朽折不可用。太府君蒞事，限期操練，兵市中無賴子，素不習武，詫步伐爲怪事。十四年十月，相率辭糧罷去。大吏以操兵過嚴舉劾，奉旨交部議處。部議革職回籍，家無一畝田，蕭然僦居郡城，而湖山寄興，詩酒頗自娛也。十六年，聖駕南巡，跪迎於高明寺。甫奏名，上在舟中問曰：「可是鄂容安所參者？」謹對曰：「是。」旋奉旨以都司錄用，以微臣姓名，聖心不忘於數年之後。由此見皇上愛惜人材，神慮周密，纖細不遺。太府君每言之，未嘗不感恩泣下也。十七年四月，補放廣東羅定協都司。二十一年，陞廣東欽州營遊擊。太府君之往嶺南也，以卑濕故未奉母周太淑人之任。及至欽州，多受瘴氣，病足，夢寐中語多念慈闈，屢欲告養歸。周太淑人諭止之，未果。於二十四年十月十六日卒於任所。兵民哭之失聲。太府君性剛介，接奉各督撫，尊卑盡禮之外，言語辭色無少附屈。於僚屬事，多爲保全，不以告人。受者久而知感。所至凡鹽樞一切陋習，皆裁泰懷金者不敢造門。太府君未第時，家素裕，備宿衛後。將十年，田舍鬻盡，及外遷，愈廉介自矢。家無一日儲，不計也。九谿城有北山，周數十里，兵民皆仰給此山。有明季指揮豪姓之子孫，訟言山本指揮舊地，總督委官勘審，將爲所奪矣。公慨然入省申

辨過洞庭湖。舟覆。賴商船救得出。至省力言地。卽豪姓地。亦明代事。且絕數萬家之葬。窆樵蘇芻牧。而以資豪姓爲利藪。大不便。總督卽違前議。從太府君議。九谿兵民大感悅。偶騎而出。見木石委積。詢知將謀建生祠。太府君立斥徹之。兵民不得已家祀一主。書長生等字。乾隆四十四年間。元父客漢上。遇九谿老兵。爲言太府君去後。此祠旋立。歲時祝之不衰。所著有珠湖草堂詩集三卷。琢菴詞一卷。箭譜一卷。陣法二卷。太府君生康熙三十四年六月初五日。距卒得年六十有五。康熙六十一年。覃恩授階奉政大夫。乾隆元年。覃恩授階昭勇將軍。卒後。櫬歸自欽州。入城治喪。乾隆二十五年。葬於揚州府城北中雷塘。以元配汪淑人繼配江淑人合祔。嘉慶元年。以孫元官誥贈資政大夫。嘉慶四年。贈光祿大夫。汪宜人贈淑人。一品夫人。候選州同知諱浩公女。生於康熙三十二年十月二十八日。卒於康熙五十七年二月十一日。江宜人封淑人。一品夫人。歙縣誥贈資政大夫諱承瑞公女。生於康熙三十二年四月八日。卒於乾隆二十一年九月四日。子四。長爲元伯父承德。汪太夫人出。娶李氏。次伯父承義。以元官。贈翰林郎翰林院庶吉士。娶江氏。封孺人。次伯父承仁。未娶卒。並庶祖妣吉孺人出。又次卽元父承信。江太夫人出。敕封儒林郎翰林院庶吉士。誥封資政大夫。內閣學士兼禮部侍郎。晉封光祿大夫。戶部侍郎。配妣林夫人。敕贈安人。晉贈夫人。晉贈一品夫人。女三。長適太醫院吏目江都鮑雲書。次適江都耿鶴齡。次適儀徵生員賈天凝。孫三人。長兆麟。長伯父生。原官揚州高郵營汛千總。次元。乾隆己酉。賜進士出身。改翰林院庶

吉士授職編修補詹事府少詹事正詹事南書房行走內閣學士兼禮部侍郎授兵部禮部戶部侍郎誥授光祿大夫次亨元次伯父承義子曾孫一人常生元之子二品廕生按吾阮氏世以武起家自元之生獨弱習馳射力輒不支父固憐之命改就經業暇時爲元述太府君平苗之捷曰是役也奇績聞當世然妣江太夫人寢食不安者十閱月故予弛騎射不事今命汝讀書成江太夫人志也比元入翰林充國史館纂修官檢閱長編太府君官階戰績稍具其略乾隆乙卯嘉慶己未間復以趨庭之訓比次追述用紀梗概託立言之君子圖不朽焉孫元謹狀

此乃嘉慶五年所撰二十五年晉贈太子少保兵部尙書右都御史兩廣總督

次曾孫福謹識

誥封光祿大夫戶部左侍郎顯考湘圃府君顯妣一品夫人林夫人行狀

嗚呼痛哉不孝臯釁至重奉職無狀於嘉慶十年閏六月十五日酉時府君考終於浙江撫署正寢由四百里馳驛奏聞卽於十五日交代巡撫暨南北關關防七月初二日奉柩登舟候旨初三日由四百里驛奉上諭阮元現丁父憂所遺浙江巡撫員缺著清安泰調補欽此不孝卽於是日解維歸里入城治喪不孝伏念府君仁厚孝慈懿行直節彰著人耳目無待不孝闡揚而後顯然不孝負隱深重靦然苦肉之間仰呼高天此慟何極若不亟以狀呈當當代公卿史職通儒文人以乞表章則罪戾滋重矣府君諱承信字

得中號湘圃。雍正十二年二月二十六日生於太府君琢菴公湖北撫標中營參將官署。乾隆元年府君年三歲。隨太府君移任湖南澧州之九谿營。乾隆五年。時太府君有征苗之捷。戮逆受降。多所全活。府君年七歲。每言凱旋之日。迎太府君於十里外。遙見旗纛甲騎。飛揚迤邐。過山而來。光景猶能記憶。十一年太府君以母周太夫人春秋高。不宜居谿山深濕地。命世父健齋公偕府君奉周太夫人歸揚州。諭以毋出遊。毋就試。俾壹意侍奉。周太夫人府君事祖母盡孝。日定省問寢膳。跬步不少離。十三年祖母江太夫人卒於揚州。府君柴毀骨立。致疾經年。十四年。太府君自河南衛輝營參將罷歸揚州。二十一年。復任廣東欽州營遊擊。時府君年二十三。仍侍周太夫人居揚州。二十二年。周太夫人命府君赴廣東見太府君計家事。二十四年。府君年二十六。太府君諭令歸娶。且曰。吾亦即欲告歸耳。府君乃歸娶先妣林夫人於揚州。是年冬。太府君以疾終於欽州。明年春。府君聞訃。慟不欲生。亟欲戴星奔。時周太夫人悲甚。伯父健齋公曰。吾必當赴粵扶柩歸。若弟亦往。孰安祖母。府君乃留揚州。是年五月。周太夫人以壽終。秋。太府君柩歸。府君遭重喪。哀慟踴踊。與伯父竭力盡心。附身附棺。無少悔。二十九年甲申。府君年三十一。正月二十日生。不孝元於西門白瓦巷舊第之南宅。即今所建之海岱菴也。自後十餘年。府君皆在揚州。府君幼讀書。治左氏春秋。爲古文辭。生長行間。嫻習騎射。每較射。挽強洞堅。善射者皆謝不及。喜乘馬。善相馬法。馳千里。不以爲勞。以侍養未與試。及是年逾三十。決意不求仕進。補國子生。閉戶守貧。家無儋石儲。澹如。

也。嘗募行蹤得囊金數鎰。坐其地。至夜半。果有返而求者。立付之。教不孝讀書。訓誨諄切。府君熟於司馬公資治通鑑。于成敗治亂。戰陣謀略。輒縱橫辨論。隨方指授。期不孝以有成。不孝侍立傾聽。警心壹志。實從此始。嘗以歐陽文忠縱囚論。蘇文忠代張方平諫用兵書等篇。口講指畫。次第授不孝。曰。讀書當明體達用。徒鑽時藝無益也。又嘗教不孝射。曰。射須沈其氣。氣不沈。志不能正。體不能直。杜詩云。顧視清高氣深穩。乃射之祕訣。家雖貧。爲不孝擇師。敬禮備至。不孝就小試時。府君親挈行。不孝幼弱。試畢出。府君一手障叢人。一手挈不孝出園外。四十四年。府君年四十六。從舅氏江澄里先生客漢陽。先妣林太夫人檢治家事。並督不孝誦讀。慈以兼嚴。四十六年秋八月。先妣以疾終。府君自漢陽扁舟冒風波。十日達揚州。傷悼甚摯。葬畢。客遊宣城。貧民有除夕不戒於火者數十家。府君往視之。罄所蓄資給之。使結舍。四十八年。府君年五十。季冬。命元娶婦江氏。四十九年。不孝入學。補附生。五十年。不孝補廩生。五十一年。府君復從舅氏江澄里先生客漢陽。秋。不孝江南鄉試中式。舉人。會試未第。府君命留京師。五十四年。府君年五十六。歸自漢陽。不孝中式進士。改翰林院庶吉士。五十五年。恭遇萬壽聖恩。府君得敕封儒林郎。翰林院庶吉士。是年。不孝散館。一等第一名。授編修。五十六年。不孝乞歸省。掌院大學士阿文成公不允所請。二月。恭遇大考。閱卷大臣置元文一等第二名。高宗純皇帝親覽。嘉獎曰。此卷詩文皆佳。擢置一等第一名。補少詹事。命在南書房行走。五月。府君挈不孝婦江氏至京師。是日。不孝自御園回城。得羽扇香葛之賜。

迎奉膝前。府君被恩感遇，喜動顏色。元嘗召對及迎養事。純皇帝問曰：汝父多少年紀？元對曰：臣父年五十八。純皇帝曰：年紀甚小。時聖壽八十餘，故云然。歸爲府君敬述之，感甚懼甚。嗚呼！慟哉！此不孝在京迎養之始。如在目前。而府君今竟棄不孝而長逝也。耶！十月，府君由京師歸揚州。不孝陞掌詹事。五十七年冬，不孝婦江氏卒於京邸。幼女荃亦殤。五十八年春，府君年六十，復至京師。五月，出京師，復歸揚州。六月，不孝蒙簡放山東學政。十一月，試沂州府舉。府君方自南來，不孝出迎沂州南門之外。琅邪古道，八騶安緩。不孝先馬入城，嗚呼！慟哉！此不孝山東迎養之事。如在目前。而府君今竟棄不孝而長逝也。耶！六十年，不孝蒙恩陞內閣學士，兼禮部侍郎。調任浙江學政。不孝奉府君由揚州至杭州。府君念不孝婦江氏無子，以族孫常生爲元子。明年入國學，補六品蔭生。嘉慶元年，府君年六十三，恭遇覃恩，加一級，誥封資政大夫、內閣學士、兼禮部侍郎。嘉慶元年，府君爲不孝聘婦于曲阜孔氏。五月，于歸杭州。嘉慶三年八月，不孝陞兵部右侍郎，轉禮部右侍郎。九月，不孝任滿，奉府君入京師。嘉慶四年正月，高宗純皇帝龍馭上賓，府君跪哭甚慟。勛元在禮部敬襄大禮。皇上親政伊始，命元仍在南書房行走，旋補經筵講官，調補戶部左侍郎，兼署禮部兵部侍郎。總裁會試，恩遇稠疊。府君語不孝曰：汝受知先皇，復受今上重恩，如此，矢勤矢慎，庶可報效萬一。不孝謹識嚴命。凡內廷禁近之事，加意慎密。各部籌兵餉，算軍需，奏宗廟山陵諸事，日不暇給。未申時始退直。府君必曰：爾少息，毋侍我前也。四月，覃恩，府君得誥封榮祿大夫、戶部左侍郎。

加一級。冬十月，不孝奉署理浙江巡撫之命。府君瞿然謂封疆重任，懼不能勝，辜負聖恩。元於召對時叩頭固辭，上不允，乃就道。是年秋，高宗純皇帝諸大禮成，元以兼禮部奉特恩加隨帶二級。府君受誥封光祿大夫，制曰：華胄清資，佑啟必原於嚴父，令儀碩望，蕃昌聿振於名門。爰渙國恩，用彰家訓。爾阮承信，乃經筵講官，戶部左侍郎，加三級。今授浙江巡撫，阮元之父，操修醇粹，啟迪勤劬，儒席傳珍，琢就珪璋之器，良材肯構，蔚爲臺閣之英。門祚方新，寵章洊被，茲以覃恩，封爾爲光祿大夫，戶部左侍郎，加三級。錫之誥命，於戲！承家有子，聿昭孝治之風，被命自天，用作義方之訓，式承茂獎，勉副休光。五年，府君年六十七。正月，元奉實受浙江巡撫之命。府君至浙江，不孝率兩軍擐甲奉輿於武林門外，慈顏怡悅，士民具瞻，嗚呼懣哉！此不孝復在浙迎養之事，更在目前。而府君今竟棄不孝而長逝也耶！是時閩浙海盜有鳳尾、箸橫、水澳、蔡牽四幫，各五六十船，安南夷盜三十餘船，船高礮大，爲患尤劇。肆劫商船，擄略子女。不孝奏置巨艦大礮，增兵設防，寧台溫分設船廠，檄道府董之。杭州鑄礮局，則中軍參將等主其事。府君日冒暑赴礮局，督促速成，俾濟軍前之用，且隨時寄示不孝指畫機宜。不孝在台州得有所稟受。六月二十二日，盜在台州松門，時三鎮總兵皆到，將進擊之。是夜海上大風雨，安南鳳尾盜船蕩覆數千人。不孝檄水陸各路兵赴海山，獲數百人，追勦餘盜，並獲僞安南大統兵進祿侯倫貴利，自夷匪入浙五六年，至是敗衄，始不敢復入浙海。府君先憂後喜，曰：神風助順，乃天子威靈，非爾及將士力也。故不孝報摺，敬陳風雨破。

賊事。皇上有誠感神祐之諭。此後水澳箬橫兩幫亦疊被浙師剿滅。惟蔡牽今尙竄於閩浙間。冬府君聚同族謀曰。我阮氏明季自淮安遷揚州。聚族於城北之公道橋。甲科世衍。世系日繁。今無祭祠。非禮也。乃獨捐俸購地。建阮氏宗祠於公道橋鎮之南。購田爲祭產。俾族姓春秋祀焉。更延名師。在祠側設塾。教族中子弟之能讀書者。又於太府君雷塘墓側建墓廬十餘楹。每展墓止宿。深寓哀慕。八年二月爲府君七十壽辰。不孝僭觴上壽。時恩賜壽字玉如意適至。不孝鑄鐔鍾以斬眉壽。歛程易疇孝廉考之。中二月夾鍾之律。以爲奇應。不孝又與諸友選商周十三吉金酒器。酌酒上壽。各賦詩一篇。門下士陳壽祺、吳彝、姚文田、鮑桂星、查揆、顧廷綸等。以詩文介壽者甚多。名篇鉅製。傳誦一時。府君感諸君子之懽心。顧而樂之。九年春二月。不孝復集諸友別選商周十三酒器。賦詩爲壽。府君呼元語曰。築園池。美居室。吾不爲也。孝經謂守其宗廟爲卿大夫之孝。禮。君子將營宮室。宗廟爲先。居室爲後。故卿大夫士皆有廟。以祭其先祖。此古禮也。我大清會典載品官皆有家廟。一品廟五間兩室。階五級。兩廡三門。以朝服少牢俎豆銅爵祀高曾祖禰四世。祧者藏夾室。此今制也。今吾家惟公道橋有族祠。在城無家廟。非禮制也。卿大夫受祿於朝。恩及先世。至正一品。乃猶若庶人。祭于寢可乎。今年京察。諭旨謂汝有守有爲。清儉持躬。汝奉職無微勞。何能當此。顧儉於躬。勿儉於先祖。其遵會典立阮氏家廟。吾將敬奉祀事。元受命卜地於揚州府舊城文選樓北興仁街。卽隨曹憲文選巷故址。鳩工庀材。秋廟成。祭服祭器咸備。府君喜遂素志。將擇日歸揚。

州奉粟主入廟矣。八月二十六日，府君晨興，將就盥盤，忽頭眩目昏，棄水傾仆。不孝時祭吳山神祠，亟歸省。知左股外之筋絡有阻，不便行步，卽延吳下各良醫，內外調治，入冬漸愈。猶不良于行。府君自五十歲後，患濕熱之疾，六十以後加重。膚肌時作癬癢，或侵脾胃，則食減神疲，然尙能騎馬。至是濕病與左股筋絡爲痼，閒形痛楚。今年入春猶未愈。府君家廟旣成，必欲親奉粟主入廟，兼以夏初往，可避杭州徽濕。且吳下名醫，不能棄其恆業。久客杭州，擬於途次就之。乃挈孫輩及家屬，奉廟主自杭登舟，道出姑蘇，僦屋暫居，爲就醫計。本意實在奉廟主至揚州也。夏至後，服藥無大效。不孝請府君勿往揚州，歸杭州。府君凄然淚下曰：吾竟不能奉神主入廟耶！大暑時，天氣暢晴，服僂尤復少差。醫者猶謂脈甚健，可待秋涼歸杭州。繼復脛腹浮腫，夜眠不安。府君始決計歸杭州矣。不孝遣長子常生代奉粟主，由蘇歸揚，入廟。不孝在嘉興查災賑，迎於平望，拜見舟中，悲喜交集。府君神明不衰。歷問海洋盜船，浙西賑濟川米平糶諸事，皆盡委曲，猶以不克親奉廟主歸揚州爲憾。迨抵署，以病久氣虛，薈桂不能見功，又忽腹瀉不可止。閏六月十五日，不能食飲，氣息漸微。以酉時遽爾棄養。春秋七十有二。嗚呼慟哉！不孝侍奉無狀，且以未諳醫理，調治失宜，負罪深重，百身莫贖。今而後長爲失怙人矣。終天抱慟，尙何言耶？府君性正直剛毅，心事光明，復忠厚仁慈，生平不爲欺人之語，不爲刻覈之事。凡年家子門下士見者，譊然如坐春風中。每於戚鄰故友，無不加意惠愛。禮曰：孝友睦婣任恤。府君實當之無愧。此桑梓之公論也。且智識明決，每論人料事，纖悉不爽。早年往來楚粵江湖間，帆背驚風，篷窗夜雨，與榜人舟子共之。性喜游覽，嘗侵曉登廬山，徘徊

移日京師之涼水河、飛放泊山東之泰岱、大明湖、鵲華、佛峪、龍洞、靈巖、浙江之桐廬、九里洲、半山、西湖、靈隱、龍井、諸山寺、莫不棹舟策騎、減僕從、探幽勝、留連忘返、或爲圖畫、屬諸友門下士題咏之、不孝視學政時、每教曰、取士當先器識、取文亦當無所不收、若以一隅之見爲去取、必有棄材矣、及不孝爲巡撫、府君于兵刑之事、時切于懷、每盜艘往來、兵船追獲、必一一記之、閩盜黃葵等、全幫投降、放出難民、府君深喜曰、此活數百人、勝于礮火中擒獲者遠矣、每秋讞及審重囚時、府君每於屏後坐聽、冀得其情有所平反、不孝兼司杭州關樞、府君曰、吾早歲涉歷江湖、深惡關吏苛橫、爾可使行旅受困耶、寬以惠商、嚴以御下、治樞之道也、有司關人入署者、府君詰之、對曰、惟聞司關人斥行旅、行旅不敢忤者、今乃行旅斥司關人、司關人不敢忤之矣、府君笑而頷之曰、可矣、武林門普濟堂、不孝所創建、嚴冬賑粥、府君親視頒粥、歸而喜曰、吾見老稚貧民、可以卒歲、卽小人亦有聊賴矣、府君治家事、性儉約、嘉慶六年、諸暨縣水災、府君出銀四千兩助賑、九年浙西水災、復出銀一萬兩助賑、曰、此吾爲汝儉省廉俸而積之者、今用以賑饑民、得用之道矣、不孝整飭育嬰堂、收養棄孩、較前倍增、禁金華府溺女、賞喜銀籍存之、貢院號舍素泥濘、全甃石版、亦皆府君教也、府君惟不孝一子、未冠失母、府君嚴慈交至、鞠育訓誨、迄於成人、愛子之心、無所不至、府君蒙太府君清白之業、秉孝慈之德、具文武之材、發光積善、以貽于不孝之身、不孝備位卿貳、府

君每勛以矢清矢忠。勤職業。毋失祖志。今年夏初。浙西復災。猶訓不孝。亟請賑恤。以仰體皇上子惠元元之意。嘉輿歸途。見領賑者舟載而歸。絡繹不絕。心乃喜。不孝德薄材短。獲從君子之後。罔致失墜。皆府君所以策勵而董教之者。不少疎也。祿養未久。遽遭慘酷。不可以爲子。不可以爲人。又何以儉生視息爲哉。嗚呼。勸哉。吾阮氏系出陳留。南宋以後。遷江西之清江縣。元末以武功顯。明初徙豪傑實江南。乃居於淮安府。明神宗時。小槐公諱巖。自淮遷揚。爲遷揚始祖。崇禎時。遷居城北四十里公道橋。二世祖諱國祥。例贈明威將軍。官榆林衛正兵千戶。三世祖諱文廣。四世祖爲府君之高祖。諱秉謙。以孫匡衡公官。貤贈武德將軍。高祖妣厲恭人。貤封恭人。節著揚州府志。曾祖諱樞良。贈昭勇將軍。曾祖妣蔣淑人。誥贈淑人。祖諱時衡。封奉政大夫。晉贈昭勇將軍。累贈榮祿大夫。光祿大夫。祖妣周夫人。誥封宜人。晉封太淑人。贈一品夫人。父諱玉堂。號琢菴。遷居揚州府城儀徵縣籍。康熙乙未科武進士。三等侍衛。賞戴花翎。歷官參將。誥授昭勇將軍。議敘頭等軍功。贈資政大夫。累贈榮祿大夫。光祿大夫。事見元所撰行狀。琢菴公元配汪淑人。贈一品夫人。候選州同知。江都浩公女。繼配江淑人。贈一品夫人。歙縣誥贈資政大夫承瑞公女。側室吉氏。以元官貤。贈夫人。府君兄弟四人。長伯父諱承德。汪太夫人以姪爲己子。次伯父諱承義。早卒。以元官貤。贈儒林郎翰林院庶吉士。府君以族姪。亨爲之後。娶於松江王氏。生子祿。次伯父諱承仁。爲長殤。並側室吉夫人出。次府君。江太夫人出。府君配先妣林夫人。勅贈安人。誥贈夫人一品夫人。不孝元林夫。

人出娶江氏。歙縣候選州同知振箕公女。卽祖妣之孫姪也。繼娶孔氏。曲阜衍聖公昭煥公孫女。誥封衍聖公世襲翰林院五經博士憲增公女。不孝四子。長子常生。聘寶應劉氏。原任丹徒縣教諭台拱公女。次子福。妾謝氏出。先是府君於五十二歲時。納側室張氏。及福生。撫育於櫛櫛中。甚慈愛。不孝命福事之。爲慈祖母。如祖母。次子祐。妾劉氏出。次子孔厚。孔氏出。女一。亦孔氏出。不孝素有記冊。復舉大略。命子弟執筆爲狀。伏冀當代公卿史職。通儒文人。錫之傳誌誄詞。藉以不朽。不孝世子孫。感且不朽。

先妣林太夫人。系出閩之莆田。明天啓中。避倭遷江南鳳陽。復遷揚州甘泉縣西山陳家集。祖得齋公。諱文連。積學有德。望於鄉里。不仕。父梅谿公。諱廷和。乾隆癸酉舉人。福建大田縣知縣。以不孝官貶。贈榮祿大夫。戶部侍郎。先妣通書史。明古今大誼。閒爲韻語。輒焚不存稿。年二十五。子歸於府城西門舊第。逮事祖姑。克盡孝養。舉止言論。必以禮法。戚黨有識者。咸嗟敬焉。丁太府君棄世。祖姑周太夫人亦繼棄世。先妣操持閨內。禮無不舉。獨不令釋道治懺醮。或曰。太夫人不受一卷經耶。先妣曰。吾阮氏林氏皆儒家。無庸此。太府君清宦歸。無產可析。且食指多。先妣曰。不及早汰冗食者。後此更不支矣。乃裁減僕婢若干人。自取剪刀。剪指甲。親浣濯。爲諸人先。府君同產妹許于賈。及嫁。先妣力治奩具。曰。當無減於先姑。江太夫人在日也。乾隆歲甲申。不孝元生。先妣自乳之。五歲教識字。六歲就外傳。不孝口吃。讀孟子孟施舍守氣等章。期期不能上口。從塾歸。自憤泣。先妣置低几於簷前。教不孝曰。爾坐。毋急遽。爾姑從我口。緩緩讀之。

一夕得其理。迺背誦如流水。嘗以外曾祖所選王維、孟浩然、高適、岑參、四家詩。付不孝讀之。先妣又手寫白居易燕詩示劉叟等篇。授讀之。并教以四聲屬對之法。故不孝八九歲即能作詩。非塾師教也。不孝十五六歲與考試。漸有交遊。每從外歸。先妣必反覆詰問。今日見何人。言何事。不孝具以對。先妣曰。某之言益者也。某之言損者也。爾某言是也。某言非也。是以不孝雖有交遊。無損友。鉛山蔣心餘編修奉其太夫人居揚州安定書院。太夫人與先妣常過從。先妣語不孝曰。讀書做官。當爲翰林。若蔣太夫人教子乃可矣。不孝謹識之。未敢忘。不孝年十七。府君客漢陽。先妣曰。爾學識日加益。當求名師之更能擴充爾學識者。遂訪於外祖梅溪公之執友胡西琴先生。先生言。進士李晴山先生可從遊。先妣趣命執贄焉。府君性正直。待人不逆詐。先妣每問外事。測情僞如目見。婉致言說。府君獲益亦多。治家事。不動聲色。府君或量計家事曰。如何。先妣必曰。無慮。此已辦矣。以故府君無內顧憂。西琴先生深於學問。佐大府幕。閱歷老矣。每聞先妣辨論事理。嘆曰。真女中丈夫。且世之丈夫亦不及也。先妣性嗜圖籍。亦愛山林。早歲從外祖之官福建。曾攬西湖、嚴瀨、仙霞嶺諸勝。歷黯淡灘之險。尤喜西湖南屏山園幽靜。常常言之。故不孝在杭州九年。不忍履小有天園之山徑。乾隆辛丑。不孝同學友天津張賜凝善畫。先妣曰。曷爲吾繪石室藏書圖。賜凝升堂拜母。申紙砥筆。並繪不孝侍讀于側。七月。先妣以徙宅勞苦。猝中重暑。以八月初二日遽棄世。嗚呼慟哉。先妣生於雍正十三年二月初四日。得年僅四十有七。葬於揚州城北中雷塘祖墓之側。乾隆

五十五年勅贈安人嘉慶元年晉贈夫人嘉慶四年四月晉贈一品夫人九月覃恩累贈一品夫人制曰推恩溯本爰賜慶于親闈稟訓入官並歸功於母教式頒渥典用播嘉聲爾林氏乃經筵講官戶部左侍郎加三級今授浙江巡撫阮元之母順以承夫勤於課子宅能三徙夙成俎豆之容織就七襄早振文章之緒徽音久著寵命宜加茲以覃恩贈爾爲一品夫人於戲鴻章疊布尙伸慈孝之思閭澤長流彌篤令共之誼廣宣休問遠樹芳儀先妣四奉恩綸未受一日之祿養嗚呼慟哉先妣棄不孝而逝者二十四年於茲矣不孝尙未以生平懿行告諸當世不孝罪也顧府君每言及先妣輒淚下不孝亦不敢頻言及之今府君亦永逝矣而今而後不孝長爲失父母之人矣哀哀父母生我劬勞欲報之德昊天罔極斯之謂矣不孝遺恨終天懼湮母德用是追憶生平粗陳梗槩呈之立言君子冀並傳焉賜進士及第詹事府右春坊右庶子門下晚生王引之填諱

案古者子不自狀其親狀者自元郝文忠始國朝之制大臣卒後國史館行文取其家狀于其子孫故不能盡拘古制也

又案此乃嘉慶十年所撰二十五年晉贈太子少保兵部尙書右都御史兩廣總督道光十六年晉贈大學士

誥贈昭勇將軍高祖孚循太府君行述

高祖孚循公之喪叔高祖諱樞忠者爲之行述刊本廬有存者元求得之刪節之爲述曰

公諱樞良字孚循祖諱文廣明神宗時官榆林衛正兵千戶父諱秉謙母厲氏生子四伯樞敬叔樞忠季樞恭公其仲也公幼孤崇禎末年兵亂厲太恭人率四子避兵於北湖之公道橋因家焉公隨伯兄治田宅致富事節母以孝聞敬兄友弟閭黨稱之讀書過目輒識大意性恬退不樂仕進督叔弟習武成武進士伯兄歿公總家事不析產不異爨以儉治家以豐蓄德一絲半粟不爲己私坦白之懷無慙衮影撫兄弟子如己子凡兄弟之子孫女子子等婚嫁皆自經畫之兄弟間情性甚篤出必刻期入必握手數十年如一日門內外無間言公好施子嘗置義塚數十畝以濟貧者鎮南石橋長數里久圯民病涉公欲新之而力不給乃造舟以濟往來鄉人貧病者施以粥食衣藥歿爲之棺每歉歲行之益力公爲人和平樂易與世無忤其持己也廉謹不肆其接人也無長幼貴賤咸以誠色溫氣和藹然如春風下至奴僕亦不加以疾言遽色故知與不知人皆稱爲長者一朝投合此肺腑也十年重見此面目也鄉人事有未平皆就公決公從容出一言莫不釋然邑行鄉飲酒禮衆皆舉公爲大賓公避不之應歿之日鄉人多爲之泣下者公生于明天啓六年十二月十七日卒于康熙四十二年五月十二日以孫官贈昭勇將軍娶蔣氏贈淑人子二長諱時衡字宗尹次藻衡宗尹公元曾祖也忠厚仁謹好善樂施一秉父教無少異孚循公兄弟四房未分爨而家事一秉于孚循公公歿宗尹公從兄弟九房家事亦皆秉于公公亦無一絲一粟之私兄弟娣姒無間言公歿乃析產公教子成進士以子官誥封奉政大夫誥贈昭勇將軍侍衛參將以曾

孫官誥贈光祿大夫，戶部侍郎，娶周氏，誥封淑人，誥贈一品夫人。公生于康熙七年九月初五日，卒于雍正五年八月二十一日。子二：長諱玉堂，元祖也；次錦堂，其先世世族諸語詳元所撰厲太恭人傳。暨祖昭勇將軍行狀。

門下士烏程張鑑填諱。

四世祖妣厲太恭人傳

恭人姓厲氏，江都人。吾阮氏自淮安遷揚州，三世祖諱文廣，當明萬歷時官榆林衛正兵千戶，罷官歸，居郡城。今舊城阮千戶巷是也。生四世祖諱秉謙，姿恭人，生四子：伯樞、敬仲、卽元、高祖諱樞良，叔樞忠、季樞恭，皆幼。四世祖早卒，恭人守其節。上孝于翁，下慈于子。崇禎末，黃得功駐儀徵，高傑駐揚州，城外兩鎮構兵之後，城危民懼，恭人請于翁曰：「兵事如此，諸子皆幼，不可居，宜早避之。」乃懷白金五十兩，隨翁挈四子出北門四十里，止於北湖之僧道橋居焉。路遇亂兵，身衛翁子，面被刀傷，卒逃免。三世祖卒後，國朝收揚州，恭人以勤儉治家，教四子成立，治田宅致富，樞忠、中康熙庚戌科武進士，得誥贈爲太恭人。樞忠子匡衡，武德將軍，及元祖昭勇將軍，亦皆以武進士起家。孫曾中式武舉人者六人。太恭人生于明神宗三十三年，卒于康熙六年，節行載揚州府志。栗主祀江都縣節孝祠。家藏遺像，鼻左刀痕，尚紅色。夫事衰翁以禮，孝也；撫幼子有成，慈也；守貞三十年，節也；知變避兵保其宗，今北湖阮氏成大族，智也。漢劉向傳：古列女有賢明智節之目，若太恭人者，比于諸傳無媿也。

擘經室二集卷二

雷塘阮氏墓圖記

雷塘在揚州宋寶祐廢城之北。漢謂之雷陂。六朝後稱雷塘。有上中下三塘之分。中塘最大。長亘東南。形如連阜。築其缺處。可瀦水千畝。今惟田中一澗。寬數丈。出其巽方缺處而已。雷塘水源從西北甘泉山來。行十餘里。入秦九女澗。又十餘里。入上雷塘。中雷塘。又五六里。入下東塘。由槐子河入運河。別有煬帝溝水。出上雷塘之後。由中塘之北而東至辰方。交于中雷塘之水。其迤南之巽方。卽元祖昭勇將軍墓所向也。元考光祿公墓。在祖墓之昭。爲子午兼壬丙向。刻立阡表。阡中灰隔深八尺。圍四丈。墓銘在灰隔中。墓中不藏寸金片玉。今以弟八世光祿公墓起算。由墓向西北爲酉辛間線長一丈五尺。爲叔祖愷聞公墓。由墓向西北爲酉辛間線長四丈。爲祖昭勇將軍墓。爲坤申間線十六丈。爲高祖妣蔣太淑人墓。爲曾祖光祿大夫宗尹公暨曾祖妣周太夫人墓。爲叔曾祖發庵公之配秦太安人墓。爲亥線十八丈。爲庶祖妣吉夫人墓。二十一丈。爲二伯父庶吉士方訓公暨配江安人墓。爲四伯父長殤端四公墓。爲寅線六丈五尺。爲四世祖武德將軍尊光公墓。爲辰巽間線十九丈五尺。乃至神道碑下。爲坤線一百二十丈。乃至墓道石坊及墓廬阮公樓下。爲辰線二百三十四丈。爲雷塘出水之巽方。煬帝溝今俗名楊家

[illegible]

北湖公道橋阮氏墓圖記

揚州府西北三十里之大儀鎮。地勢甚高。其脈自其西南橫山來。至大儀特起。復東北行二十里。至黃子

湖潯。爲九龍岡。卽今公道橋鎮也。

本名僧度橋。官名僧道橋。

橋鎮距府城四十五里。出府城北門。北行過上雷塘橋。方家


巷。雨膏橋。

一名火燒橋。

避風菴。渡湖。始達于橋鎮。鎮居民千餘家。有關帝司徒諸廟。明末予三世祖奉軒公。四

世祖妣厲太恭人。挈四子避高傑兵亂。自城逃止於此。因聚族居之。去鎮西南二里許。有小橋曰陳家橋。大儀以南甘泉山以北之水。東匯于荒湖。北流經橋南繞鎮而東而北。爲黃子湖矣。陳家橋之北百步內之平岡。卽予三世祖四世祖妣高祖孚循公墓所在也。予妻江夫人。舊殯雷塘。嘉慶二年。奉光祿公命卜葬于四世祖妣墓之西北。向西兼南。以予視之。其所謂樂哉。瑕耶者乎。阮氏宗祠及樓。則在鎮市之南。面臨湖水。西望墓田。近在目前也。因記雷塘墓。遂并圖記之。







今甘泉縣官冊地名曰公道橋。而舊時之寫者呼者。則或曰僧道橋。僧度橋。孫大橋。以余論之。以僧度橋爲近是。此地乾隆乙巳大旱。水涸湖底多古石。當是宋時物。宋時橋梁等工。每用度僧牒銀爲之。蘇州度僧橋。卽其遺制。此橋不及蘇州之高。但其用度僧牒銀造之。諒亦相同。特無碑記可考耳。附記於此。

雷塘阡表

嘉慶十年冬。十有二月乙酉。葬我顯考湘圃府君於揚州城北中雷塘祖墓之側。顯妣林太夫人。先以乾隆四十六年卒。葬於此。遂祔焉。旣乞銘刻納墓中。越旣祥。子元乃表於墓曰。我府君於雍正十二年二月二十六日。生于祖考琢菴府君湖北官署。三歲隨之湖南。七歲祖考有征苗之捷。受降止殺。全活甚多。凱旋之日。旌旗蔽山。府君憶及恆言之。祖考復任廣東。命府君歸奉大母周太夫人於揚州。府君年二十六。娶顯妣林夫人。明年丁祖考喪。暨周太夫人喪。致哀毀。禮無不舉。顯妣主閭內。不令釋道與喪事。曰。非禮也。府君年三十一。生元。時家益中落。府君耿介守貧。暮行蹴地得金數鎰。坐待覲者。問而歸之。以奉大母。且遭喪。未就試。及是補國學生。讀書治左氏春秋。爲古文辭。生長行閒。耐騎馬。善射。熟復司馬公資治通鑑。於成敗治亂戰陣謀略。多辨論。舉以教元。嘗教元射曰。此儒者事。亦吾家學也。顯妣生于雍正十三年二月四日。考諱廷和。癸酉江都縣舉人。官福建大田縣知縣。顯妣通書史。明古今大誼。逮事祖姑。盡孝養。舉止必衷於禮法。于歸次年。丁重喪。乃減食指。遣僕婦。自翦指甲親澣濯。元七八歲。口吃。讀孟子孟施舍

守氣章不上口。塾師莫能爲力。顯妣曰。爾姑從我緩緩讀。已而乃成誦。復手寫白居易諸詩授元讀之。教以四聲屬對之法。元於是能作詩。及爲成童。於親師取友。謹言慎行之道。誨尤切。府君壯歲游楚中。乾隆五十六年。元官詹事。在南書房行走。就養京師。元官山東學政。浙江學政。浙江巡撫。皆迎養。嘉慶五年夏。安南僞總兵盜船。及閩盜鳳尾等船。勾結數千人。闕浙之松門。元會水陸兵於台州禦擊之。府君在杭州。冒暑眎鑄大礮工。濟軍前之用。時時寄示機宜。元得所受。六月廿二日。大風雨。盜船蕩覆。元乘風擊之。獲其餘盜。及安南僞總兵僞爵侯。府君教也。杭州剏建普濟堂。冬賑粥。貢院士子萬舍。皆甃石版。若茲事。亦府君教也。府君教元練兵省刑。毋諱災。嘉慶五年六年。金華諸暨等縣災。九年十年。浙西災。府君教元請振卹。以體皇上愛民之心。前後凡蒙恩賑二百數十萬口。府君自出俸銀一萬四千兩以助賑。曰。此我數年來儉積之廉俸。今用以捄饑民。得用之之道矣。我阮氏聚族于府城北四十里之公道橋。族姓繁。未有祖祠。府君獨出俸錢建祠。置祭田。合族春秋祀焉。祠側設塾。延師教子弟。使之讀書知學。又於府城文選樓後街建阮氏家廟。遵大清會典一品官制。廟五間。兩廡三門。以少牢祀高曾祖禰四室。及東西祔。曰。受封贈於朝爲正一品。猶若庶人祭於寢。可乎。茲所立廟爲古禮。亦國制也。府君性正直剛毅。仁厚忠誠。生平不爲欺人之語。不爲刻覈之事。與顯妣相敬如賓。顯妣治家事。不動聲色。皆就理。故府君出遊無內顧憂。族戚中有學識者。聞顯妣論事理。歎曰。真女中丈夫。且世之丈夫猶不及也。顯妣性嗜圖籍。亦愛山林。

蚤歲從父之官福建。攬西湖嚴瀨仙霞嶺諸勝。常常言之。乾隆辛丑八月二日。以暑疾卒于揚州。府君於嘉慶十年閏六月十五日。以濕熱之疾卒于杭州巡撫署中。以元官封儒林郎翰林院庶吉士。累封資政大夫。內閣學士。兼禮部侍郎。加一級。榮祿大夫。戶部左侍郎。加一級。光祿大夫。戶部左侍郎。加三級。顯妣初贈安人。累贈夫人。一品夫人。嗚呼。吾顯考蒙祖考清白之業。秉孝慈之德。兼文武之材。發光積善。以貽於元之身。且考妣惟生元一人。撫之育之。教之勸之。凡元之學有所進。識有所明。少備國家任使者。皆數十年義方之訓。劬勞罔極之恩也。茲以合葬刻石於阡。以表我二親之德。爰出家牒。乞翰林前輩奉賢陳先生廷慶書石。并填諱書先世男元表。湘圃公諱承信。字得中。曾祖諱樞良。贈昭勇將軍。配蔣淑人。贈淑人。祖諱時衡。封奉政大夫。贈昭勇將軍。累贈榮祿大夫。光祿大夫。戶部左侍郎。配周太夫人。封宜人。太淑人。贈夫人。一品夫人。父諱玉堂。康熙乙未進士。三等侍衛。賞戴花翎。湖北撫標湖南九谿河南衛輝參將。廣東欽州遊擊。議敘頭等軍功。誥授昭勇將軍。累贈資政大夫。榮祿大夫。光祿大夫。戶部左侍郎。配汪夫人。繼配江夫人。贈封淑人。累贈夫人。一品夫人。湘圃公江夫人出。湘圃公生子一。孫四。曰常生。曰福。曰祐。曰孔厚。

雷塘阮公樓石刻象記

奉賢陳廷慶書石填諱。

揚州城北中雷塘。卽隋之大雷。漢書所謂雷波也。其地勢自甘泉山來。兩水夾地而行。數十里會於塘之東南。元四世祖武德將軍尊光公。明天啓開實始葬於此。六世祖曾祖考光祿贈君宗尹公。七世祖考招勇將軍琢庵公。八世考光祿封君湘圃公。皆以昭穆附葬焉。墓西南半里許有墓廬。廬北有樓三楹。高二丈許。東望松楸碑石。皆在目前。每當霜草風木。寒雪夜月。噉然以號。曷可言已。樓中繪四世象刻於石。焦君循書扁質言之曰。阮公樓。庶幾先世靈神棲降於此。顧視子孫丙舍無恙。罔所恫也。爰記此。命子常生書石之後。俾子姓世守葺新之。九世孫元敬記。十世孫常生福祐孔厚侍。

揚州阮氏家廟碑

嘉慶九年歲星次甲子。元撫浙五年矣。父呼元于庭。語元曰。元。汝知古禮乎。知今制乎。孝經謂守其宗廟爲卿大夫之孝。禮君子營宮室。宗廟爲先。居室爲後。故古卿大夫士皆有廟以祭其先祖。此古禮也。我大清會典載品官皆有家廟。一二三品官。廟五間。兩室階五級。兩廡三門。以朝服少牢俎豆。鉶爵祀高曾祖禰四世。祧者以昭穆藏于夾室。此今制也。我顯考琢庵府君。以武功貴。雍正十三年受恩贈封祖父皆昭勇將軍。妣皆淑人。吾教汝學。汝貴。嘉慶四年受恩贈封曾祖祖父皆光祿大夫。妣皆一品夫人。今吾家惟北湖公道橋有族祠。在城無家廟。非禮制也。卿大夫受祿于朝。恩及先世。至正一品崇矣。乃猶若庶人祭于寢。可乎。今年帝考岳牧之績。帝曰。汝元有守有爲。清儉持躬。敕部臣加一級。汝奉職無微勞。恩至重。

褒至榮。曷克稱此。顧儉于躬。勿儉于乃先祖。其遵會典立阮氏家廟。吾將敬奉祀事。元拜受命。曰唯。迺卜地于揚州府舊城文選樓北興仁街。鳩工庀材。越九月。廟成。奉高曾祖禰四室木主及祔位主入廟。祭田祭器祭服咸備。以成禮制。以致孝敬。樹碑于外東階。與文選泉東西相直。銘曰。阮氏偃姓。肇受商周。晉宋之間。著望陳留。唐宋乃南。臨江分流。元末江右。武功以顯。明徙豪傑。江淮運轉。大河阮氏。族姓乃衍。明季徭頻。脫籍于揚。崇禎之終。遷于北鄉。我朝選材。甲科騰驤。匪曰甲科。實有隱德。歷世仁厚。節儉正直。內備宿衛。在帝之側。出將楚兵。南征有苗。十戰皆捷。受降于郊。碑題緩帶。家藏佩刀。帝錫四世。階如孫秩。作廟揚州。得祀四室。非敢後也。有待今日。祖德蔭後。後嗣奉先。隆厥棟梁。潔我豆籩。子子孫孫。保之萬年。萬年永保。作善降祥。報國之恩。衍家之慶。文武孝慈。世系繁昌。

揚州隋文選樓記

揚州舊城文選樓文樓巷。考古者以爲卽曹憲故宅。嘉靖圖志所稱文選巷者也。宋王象之輿地紀勝。於揚州載文選樓注。引舊圖經云。文選巷卽其處也。煬帝嘗幸焉。元案新舊唐書。曹憲江都人。仕隋爲祕書學士。聚徒教授。凡數百人。公卿多從之遊。於小學尤邃。自漢杜林衛宏以後。古文亡絕。至憲復興。煬帝令與諸儒譔桂苑珠叢。規正文字。又注博雅。貞觀中以宏文館學士召。不至。卽家拜朝散大夫。卒年百五歲。憲始以梁昭明文選授諸生。而同郡魏模。公孫羅。江都李善。相繼傳授。于是其學大興。羅官沛王府參軍。

事無錫丞。模武后時爲左拾遺。模子景倩。官度支郎。及曹君門人句容處士許淹。皆世傳其學。善見子邕傳。又李邕傳云。江都人。父善。有雅行。淹貫古今。不能屬辭。人號書簞。官太子內府錄事參軍。顯慶中累擢崇賢館直學士。轉蘭臺郎。兼沛王侍讀。爲文選注。數析淵洽。表上之。賜賚頗渥。除潞王記室參軍。爲涇城令。坐與賀蘭敏之善。流姚州。遇赦還。居汴鄭間。講授諸生。四遠至傳其業。號文選學。善又嘗命子邕。北海太守贈祕書監。補益文選注。與善書並行。又藝文志載。曹憲爾雅音義二卷。博雅十卷。文字指歸四卷。桂苑珠叢一百卷。李善注文選六十卷。文選辨惑十卷。公孫羅注文選六十卷。又音義十卷。曹憲文選音義幾卷。元謂古人古文小學。與詞賦同源共流。漢之相如子雲。無不深通古文雅訓。至隋時曹憲在江淮間。其道大明。馬揚之學。傳於文選。故曹憲旣精雅訓。又精選學。傳於一郡。公孫羅等皆有選注。至李善集其成。然則曹魏公孫之注。半存李善注中矣。憲于貞觀中年百五歲。度生于梁大同時。爾時揚州稱楊一益二。最殷盛。文選巷當是曹氏故居。卽今舊城旌忠寺文選樓西北之街也。今樓中但奉昭明栗主。元以爲昭明不在揚州。揚州選樓。因曹氏得名。當祀曹憲主。以魏模。公孫羅。李善。魏景倩。李邕。許淹。配之。唐書於李善。稱江夏人。而李邕傳則曰江都人。蓋江夏乃李氏郡望。唐韻載李氏有江夏望。大唐新語亦稱江夏李善。李白詩亦稱江夏李邕。是善邕實江都人。爲曹魏諸君同郡也。唐人屬文。尙精選學。五代後乃廢棄之。昭明選例。以沈思翰藻爲主。經史子三者。皆所不選。唐宋古支。以經史子三者爲本。然則韓昌黎諸人

之所取。乃昭明之所不選。其例已明著于文選序者也。桂苑珠叢久亡佚。聞見引于他書。其書諒有部居。爲小學訓詁之淵海。故隋唐閒人注書引據。使而博。元幼時卽爲文選學。旣而爲經籍纂詁二百十二卷。猶此志也。此元曩日之所考也。嘉慶九年。元旣奉先大夫命。遵國制立阮氏家廟。廟在文選樓。文選巷之閒。廟西餘地。先大夫諭構西塾。以爲子姓齋宿飲餽之所。元因請爲樓五楹。題曰隋文選樓。樓之上奉曹君及魏君公孫君李君許君七栗主。樓之下爲西塾。經營方始。先大夫慟捐館舍。元于十年冬哀敬有構之。越旣祥。書此以示子孫。俾知先大夫存古蹟。祀鄉賢。展廟祀之盛心也。元謹記。

揚州文樓巷墨莊考

揚州文樓巷墨莊者。宋劉黻、武賢、滌、三世之所居也。劉式者。李唐新喻人。生五子。其第四子立德。立德生黻。黻生武賢。武賢生滌。滌生靖之。靖之。式字叔度。開寶中隨李氏入宋。官工部員外郎。判三司磨勘司。贈太保禮部尙書。妻陳夫人。旣寡。以遺書教諸子曰。先大夫秉行清潔。有書數千卷。以遺後。是墨莊也。安事畝隴。諸子怠于學者。則爲之不食。由是諸子皆以學爲郎官。孫廿五人。世稱墨莊夫人。此宋初墨莊之在江西者也。立德官祕書監。贈太尉。黻官太中大夫。歷守淮揚池睦溫。始遷居于揚州文樓巷。武賢官承議郎。知盱眙縣。生滌于全椒。滌字全因。兩監潭州南嶽廟。以通直郎致仕。武賢沒。妻李氏。當建炎時。識揚州將亂。與滌避地江西。故兵戈不能害之。滌妻趙氏。賢而文。夫婦手寫經以課子。靖之子。和。官贛州教授。清

之子澄判鄂州與朱子羅願相友善滌請徐兢吳說各以所善篆楷書墨莊字此墨莊之在北宋及南宋初而羅願鄂州集所謂太中以來居揚州文樓巷者也外此則集賢公是先生斂舍人公非先生斂皆立德仲兄之子居撫之金谿其八世孫與吳草廬虞道園相友善滌爲武賢第四子其第三子沂亦奉母命由揚州避地豫章之新吳沂生蕭羅願代陳臯爲蕭傳岳鄂王紹興六年曾爲新喻劉氏寫墨莊二字此墨莊之在南宋江西者也海陵胡安定先生載陳墨莊夫人事入賢惠錄此在揚州之事也朱子墨莊五詠一曰墨莊二曰冽軒三曰靜春堂四曰玩易齋五曰君子亭明楊廉和朱子五詠詩序曰劉氏靜春與集賢舍人各自爲派蓋靜春堂爲劉斂專派斂與斂斂爲從兄弟故其孫曾清之等皆以靜春自稱金谿公是先生等派不襲靜春之名然則靜春等堂軒五名亦皆宜在揚州矣元居揚州文樓巷文選樓側時方纂揚州圖經檢舊志但知有文樓巷不知巷有墨莊事乃旁考宋史朱子羅鄂州劉公是吳草廬虞道園等集及江西地志朱高安墨莊石刻跋而述之如此夫劉氏自南唐入宋以至元明代有聞人皆讀書爲義理之學所交遊者則有歐陽永叔曾子固胡安定朱子羅鄂州吳草廬虞道園諸人故其家世言行官階多見于諸集以忠厚大其族以文學啓其後而又世有賢母教子亢宗墨之爲物貫金石而不朽莊云乎哉

揚州北湖小志序

元但通籍儀徵而已。實揚州郡城北湖人也。元家在北湖九龍岡。族姊夫焦里堂孝廉。家在黃珏橋。相隔一湖。幼同學。往來湖中者屢矣。嘉慶丙寅丁卯間。奉諱家居。亦常至北湖。孝廉出北湖小志。藁示余。余讀而韙之。孝廉學識精博。著作等身。此書數卷。足覘史才。夫以北湖周回百里中。水地古蹟。忠孝節義文學武事。悉載于是。是地出靈秀。特藉孝廉之筆。以傳斯地之事也。使各郡縣數十里中。皆有一人載筆以志其事。則郡縣之志。不勞而成矣。亟索其藁。棄于板。以貽鄉人觀覽。以待長官采摘焉。

淮安大河阮氏世系記

予族自明季由淮遷揚。皆始祖諱巖所產也。歲壬申。予奉命總督淮揚。駐淮安府。從阮唐山少司寇。癸生家。取其山陽族譜攷之。因記其略曰。始祖諱武德。字再二。世爲江西臨江府清江縣人。居十九都時。稱棗兒村。阮家元末以武功顯。明鼎定。徙豪傑實江南。遂隸鷹揚衛。旣改大河衛。墓在今潤河南岸三里塘之南。洪武十六年。武德產敬。敬妻孫氏產嵩。正統十三年。嵩妻馬氏產連。成化十一年。連妻瞿氏產鑒。鑒號月窗老人。始讀書爲諸生。正德元年。鑒妻陳氏產淳。淳多隱德。練鄉兵備倭。以所儲粟餉軍。妻袁氏。妾方氏。嘉靖十二年。淳生嘉林。嘉林字仲立。號鳳居。嘉靖辛酉舉人。隆慶戊辰會試副榜第一。官湖廣益陽縣知縣。舉天下第一清官。行取御史。年七十二。葬七里塘之原。嘉林妻裴氏。產世勳。爲淮安族所自出。嘉靖三十五年。裴氏產世美。爲次子。世美妻盧氏生子三大福。泰福。全福。萬歷天啓間。徭役繁興。民不堪命。衛

所之中。官盡欄牛。吏同冠虎。遂攜家南徙。脫衛籍。此山陽族譜之大略也。余家揚州。舊譜諱巖公。於明萬歷中。由淮安遷揚州。似相合矣。惟是諱字不合。怒焉傷心。安敢於世系所從來。傳會臆斷之耶。然淮安大河阮氏之世系。實不可不知。故書此闕疑。以示後人。

再淮阮氏。皆裴孺人出。淮譜舊記云。裴孺人。贛榆縣人。光祿卿裴公天祐之女。隆慶初元。鳳居公偕計入都。至山東某縣。負襁被宿。逆旅中。少頃。遇褐父。頰白者。叩公名氏。色甚駭。略詢家世姻族。急索制舉藝觀之。遂奔去。公亦不置意。比夜。則市中人語喧。聽車馬馳驟聲。聒耳不能眠。第聞曰。新巡方至矣。厥明。公將戒途。有騎而至者。持刺邀公去。方誰何間。已挾之而騁。及堂皇。則疇昔所遇者。盛服供立以埃。延就賓館。極燕衍之盛。居數日。郡邑有司。頻煩將命而至。議館甥焉。蓋裴公以繡衣巡按山東。偶宿神廟中。夢觀天榜。其第一人爲阮某。裴時有愛女及笄。擇壻無當意者。得是夢。輒心動。微行時。潛物色之。忽於逆旅得公。以爲天作之合也。公承命。殊不自得。再三辭。不獲命。遂於行臺結褵焉。明歲戰南宮。已在魁選。主者以策語觸時忌。改置副榜第一。旋注銓籍。授官。非公所樂也。裴孺人歸後。舅姑安其養。益陽惠政。亦多裨助。吾宗生齒不繁。至鳳居公始昌。越數十年。小宗又復衰落。今之聚族於淮。奉蘋藻而衍箕裘者。皆裴孺人所出也。嗚呼。神廡一夢。豈偶然哉。孺人卒於萬歷庚子年。年五十三。封孺人。

林清泉公傳

公諱廷岳，字詢四，號清泉，姓林氏。晉愍帝時，黃門侍郎穎從元帝渡江入閩，四十六世顯。當明天啓，因倭變遷江南鳳陽之桐城鎮，復遷揚州府甘泉縣陳家集。自顯至公，復九世。公爲得齋公之季子。梅谿公之弟，公天性淳正，忠厚篤于孝弟，里閭戚黨皆稱敬之。得齋公年六十有四病，公籲于天，以身代，刲臂肉，祕以入藥，病遂愈。後二十年，得齋公再病，再刲之，病亟不能食藥而卒。今臂癰纍纍然，奉母王太夫人亦竭力，致壽九十。公以梅谿公服官，遂不求仕，以養親爲己職。梅谿公清宦有貨，尙有未償者，公或代償之，集諸子及梅谿公諸孫焚其書券，曰：「吾受伯兄教，昔代償者，今忍言乎？」諸從孫皆拜泣，各出錢以奉甘旨。公受之曰：「使爾等心安，亦一道也。」公幼篤學，治周易，著詩古文詞，精於醫，尤善治目，賴不失明者千百人。爲閩越齊魯之遊，以山水自娛，善鼓琴，善弈，習鎗槊，性嗜茶，于屋內壁間置茶竈，泉必自淪，薪必自爇，具各種茗葉壺盞烹而奉客，有玉川之風。公生平無惡念，無俗情，無不可對人之事。卒于嘉慶八年十二月四日，年八十一。太學生敕封承德郎子三長蘇門公衍聖公府辟佐府事，乃爲其掾。次稼門禹門孫念曾，曾孫纘祖，論曰：縣舉孝廉方正一人，嘉慶元年恩詔也。大吏以名不易稱，難其選而靳之。夫大吏之有封蔭，亦恩詔也。未聞有以祖德不立子不才而辭者，何獨于民之賢者而靳之，十步之內必有芳草，十室之邑必有賢士，若公者，或所謂孝廉方正者乎？元梅谿公外孫也，知公深無虛詞，無溢美也。

節孝林母傳

節孝高夢輝之女。年十九歸揚州甘泉梅谿林公爲側室。林公元外祖父也。以舉人選授大田縣知縣。外曾大父母年老畏遠涉。留外大母俞夫人奉養。公蒞大田。無以襄內政。乃以節孝隨。節孝綜理諸內事。能代公勞。公潔己愛民。官齋蕭然。無兼味。節孝曲體公意。儉以律身。勤以率衆。邑人翕然稱之。越三年。外曾大父病終於家。公性至孝。哀甚毀。疾遂不起。時嫡出四子皆在揚州。節孝甫生庶子名閔。慟不欲生。親黨之在閩者。以扶櫬撫孤。勸乃強食粥。及扶櫬杭海。由乍浦抵家。元外大母俞夫人亦前卒。一歲之中。遭三喪。外曾大母日在涕淚中。節孝茹哀侍奉。能得老人心。戚族嘆美以爲難。元舅氏四人。年皆長。名閩者又夭折。節孝傷之。大舅氏以次子跂曾爲閩後。所以慰節孝也。諸舅氏皆館於外。復相繼卒。所遺孤皆幼。節孝偕諸嫡子婦操作。教諸孫力學。書聲與紡聲恆相和。如是者十餘年。諸孫乃屹然有成立者。嘉慶七年。族黨共列其行請於朝。得旌表節孝。建坊于門。嘉慶十九年卒。年七十有七。元母林太夫人感庶母之孝節也。事之甚恭。且禮法性情。若契而合。元幼隨先妣住外家。嬰病。節孝助先妣撫元者備至。故知其行爲傳焉。

李晴山齋書西二先生合傳

李先生諱道南。字景山。號晴山。先世由丹徒遷江都。富于貲。父敬修。光祿寺典簿。和而介。疏於持籌。好施與。家遂貧。母早卒。無子。先生與兄雷。皆側室胡氏出。先生旣孤。胡太孺人以女紅撫之。讀或勸理舊業。太

孺人曰。吾將以貧勵子學。不願使從富家子遊。先生既補儒學生員。以學行高于時。所居草屋數間。冬衣葛。行者夜分猶聞讀書聲。學使者重之。有寒氣逼人之歎。學官吳銳。李安溪高弟子。嘗偕客過其廬。講學逾時。太孺人解敝衣。穴屋後席壁。屬鄰媼質錢市盞殮享之。遇斷炊。輒賁市餅以爲食。先生屬文。必以微言發經義。恥爲華靡。常曰。文以勵行。若視爲科第之階。未矣。故試屢不中式。貧益甚。然雖餒臥。不安受一錢。乾隆己卯省試。以第八人貢于禮部。辛卯會試。中式第二。榜初發。總裁同考官知先生名。願早見。且招致之。先生不往。既殿試。賜同進士出身。始謁座師。是以名益重。總裁莊方畊閣學士。以東獨招先生往。論學術。相契愈深。謂先生曰。子之學問人品。予知之矣。顧甚貧。何以歸。予將命同人贐子。先生固辭。既而車馬至先生館舍。致贐者甚衆。先生知其意。概謝之。閣學士聞而歎曰。介至此乎。先生例選知縣。不赴選。設教鄉里。生徒數百人。雖宿儒。皆執贄受業。嘗主泰州通州淮安書院講席。先生穎敏過人。而操行剛正。以古名儒自勵。對策剴切詳盡。事母孝。事兄悌。所著有四書集說十二卷。太孺人將卒。執先生手曰。還是讀書。先生以是語名其堂。太孺人鍼黹數十年。遺斷鍼盈篋。先生每撫之泣。海內通人名士。爲詠其事。先生錄爲斷鍼吟一卷。兄雷亦善屬文。既沒。先生輯兄文及先生文爲同懷寸草錄。四卷。乾隆五十二年卒於家。年七十有六。子二本善。元善。

喬先生諱椿齡。字書酉。甘泉人。性穎悟。勤學。通諸經義。涉獵百家子史。尤深于易。撰著屢有驗。善屬文。以

漢魏爲法。補儒學生員。試輒高等。而未嘗食廩餼。省試亦不中式。先生性剛直廉介。跬步必以禮。交游皆擇正士。友有過。相規無隱。一時僦儻之士。見先生。皆深自斂抑。居陋室。甚貧。枕席皆書。苟非義。雖周之不受。體羸多病。不婚娶。元幼受業于先生。乾隆癸丑。元督學山東。迎先生。冬十一月相見於曲阜。衡量孔顏曾孟四氏子弟之文。謁至聖林廟。觀禮器。先生欣然。躊躇若滿志焉。明年春。至登州。道病。返至青州。卒于試院。年四十三。野有古木。元伐之。爲先生棺。歸葬揚州。

論曰。吾年九歲。從喬先生學。年十七。從李先生學。兩先生爲吾鄉特立獨行之儒。而吾皆師之。吾所幸也。兩先生績學砥行。深自韜隱。而元竊高位厚祿。過于師。吾所愧也。嗚呼。吾幼年見許于兩先生。使先生今尙在。許吾耶。抑責吾耶。是以每念先生。深自省也。

胡西琴先生墓誌銘

先生姓胡。諱曰廷森。字衡之。號西琴。先世唐宣歙節度使常侍學之後。十五世當元時。祖大中。籍饒州。官休寧。遂遷焉。高祖學龍。遷江都。父濤齡。國學生。先生身長體腴。事父孝。年逾三十。猶引過受杖。侍母疾。晝夜長跼呼天。疾爲痊。幼讀書。試未第。乃以文學佐大吏幕府。之奏章。通達治體。所繕奏皆稱旨。兩江總督薩公載等。交聘延致之。先生兼精刑律。年五十無子。或曰掌刑者艱於嗣。先生曰。吾儒生欲活人。無尺寸權。正欲佐人于刑中求嗣也。故其治刑也。以仁輔義。有合于歐公求生不得之愷。所全實多。卒舉丈夫子。

遂杜門却聘。謝外交。與里中秦序堂、沈旣堂諸先生爲湖山遊。杖履吟詠。有香山之風。元初任巡撫時。先生至杭。爲壁畫一切。元以政事切問之。悉其情。逾月。兵刑漕賦事略定。先生曰。可矣。乃返揚州。嘉慶元年。恩詔縣舉孝廉方正一人。里中搢紳皆以先生應舉。具牘達之官矣。而史胥慙之。先生曰。搢紳勿與史胥言。言則不廉不正矣。以是卒未達大府。嘉慶八年。先生卒于家。年八十有五。先生工詩。善於言情。其佳處極似放翁。著西琴詩草一卷。授職州吏目。配李安人。子德生。職州同知。側室劉安人出。冬十一月葬揚州西門外老人橋之右。元幼時。以韻語受知于先生。先生授元以文選之學。導元從李晴山先生遊。先生于元外祖林公爲執友。公子婦林氏。元母之姪也。元入覲返。過揚州。哭先生。乃爲銘曰。

先生之行。在孝與慈。先生之學。在書與詩。先生之才。經濟匡時。毀晦恬退。世莫之知。知之深者。非元伊誰。丸丸宰木。岡道具宜。爰伐樂石。載此銘詞。

劉端臨先生墓表

劉先生諱台拱。字端臨。其先世由江南蘇州遷揚州寶應。六世祖永澄。萬曆辛丑進士。與高忠憲、顧端文、劉忠端諸公講學東林。曾祖中從。康熙戊子舉人。石埭縣教諭。祖家昇。甲午副貢。父世蕃。貢生。靖江縣訓導。靖江君五子。先生居長。先生幼不好戲。六歲。母朱安人歿。哀毀如成人。旣而事繼母鍾安人。亦盡孝。入家塾。終日端坐。未嘗離席。獨處一室。亦必以正。九歲作顏子贊。十歲心慕理學。嘗於其居設宋五子位。朝

夕禮之出入里閭。目不旁睽。時有小朱子之目。年十五。從同里王君雒師學。及見王予中。朱止泉兩先生書。遂篤志程朱之學。十六補縣學生。二十一中式舉人。試禮部。大興朱文正公時。以翰林分校。得先生經義。用古注。識爲積學之士。亟呈薦。已中式矣。以次藝偶疵被放。文正惜之。終其身。是時朝廷開四庫館。海內方聞綴學之士雲集。先生所交遊。自大興朱學士筠。歛程編修晉芳。外休寧載庶常震。餘姚邵學士晉涵。同郡任御史大椿。王給事念孫。並爲昆弟交。稽經考古。旦夕講論。先生齒最少。每發一議。諸老先生莫不折服。先生之學。自天文律呂六書九數聲韻等事。靡不貫治。諸經中于三禮尤精研之。不爲虛詞穿鑿。故能發先儒所未發。當世儒者。撰書多采其說。乾隆五十年。授丹徒縣訓導。先生勤于職。月必考課。其教以敦行立品爲先。而能以身示之。嘗謂校官不常接士子。則術業無由聞知。故諸生以時進見者。必以廉恥氣節爲敦勉。暇則誦習古訓。親爲講畫。境內饑。大吏以賑事委先生。先生慨然曰。校官無事可自効于國。此我職也。乃親歷窮巷。俾胥吏無侵刻。一邑感之。生平無嗜好。唯聚書數萬卷。及金石文字而已。齋鹽淡泊。晏如也。先生慎于接物。尤廉于取。交遊如段茂堂。王懷祖。汪容甫。諸先生。尤莫逆。朱學士曰。劉君大賢也。豈獨學問過人。邵學士曰。予遊京師。交友中淵通靜遠。造次必儒者。端臨一人而已。汪容甫曰。吾心折劉君者。劉君欲吾養德性而無騁乎血氣。此吾所以服也。靖江君疾。先生辭官歸。日侍湯藥。晝夜不倦。及靖江君鍾安人相繼卒。先生水漿不入口。出就外寢。蔬食五年之久。青浦王侍郎昶。以爲有曾閔之孝。

歲時祭祀齋戒哭泣戚戚者數日。居家教諸弟雖嚴然怡怡和悅人皆歎羨之。宗族有少孤不能讀書及困苦不能自振者皆賙給之。先生德盛禮恭人有所長必誘掖之使進若有所短則絕口不言但勸勉之使自愧悔終身無疾言遽色故其爲校官也上官待以殊禮至于頑夫驕子對之無不抑然自下體素羸疊遭大故益衰弱嘉慶十年五月廿二日以疾卒距生于乾隆十六年閏五月初二日年五十有五娶山陽曹氏無子妾夏氏生子二源岷源嶠源岷早卒女三長適余長子常生二品廕生次字溧陽史氏殤幼許字同邑增貢生朱聯奎子仕祿所著文集及論語駢枝荀子補注漢學拾遺儀禮補注經傳小記惟稿多零落厘輯成七卷淮南子定本諸書亦未卒業先生葬於寶應某某之原同鄉儒者皆欲列事實請祀鄉賢祠元與先生友學最深且爲姻家乃紀其學行揭于阡

浙儒許君積卿傳

許君名宗彥字積卿又字周生浙江德清人明史儒林傳許孚遠之後曾祖鎮康熙壬辰翰林院編修江西南昌府知府祖家駒乾隆丁卯舉人西安學教諭父祖京己丑進士內閣中書廣東布政使母胡氏君生有異質九歲能讀經史善屬文時中書君主劉文正公家文正公見君甚器之青浦王公昶愛其才作積卿字說載春融堂集君十歲卽不從師經史文章皆自習之乾隆丙午舉于鄉嘉慶己未成進士授兵部車駕司主事是科得人最盛朱文正公曰經學則有張惠言等小學則有王引之等詞章則有吳鼐等

兼之者宗彥乎。君性孝友。偶以禮部試離親左右。卽泣不忍別。隨父任。先意承志。曲盡孝力。事兄事女兒。皆悌愛。純摯。雖性情和平。神理澄淡。然見者皆肅然敬之。嘗訓諸子曰。讀書人第一須使此心光明正大。澄清如止水。無絲毫苟且私曲。不可對人處。故名所居曰鑑止水齋。君自入兵部後。兩月。卽以親老引病歸。丁母憂。復丁父憂。旣免喪。猶纓纓然惡衣疏食。恬淡無宦情。遂不復仕。居杭州杜門以讀書爲事。君子學無所不通。探賸索隱。識力卓然。發千年儒者所未發。是爲通儒。所著有鑑止水齋文集十二卷。詩八卷。集多說經之文。其學說能持漢宋儒者之平。其辭曰。學者何。子曰。行有餘力。則以學文。又曰。十室之邑。必有忠信。如吾者焉。不如吾之好學也。子路言何必讀書然後爲學。是聖門本以讀書爲學。雅言詩書執禮。學之事也。所以學者何。子曰。生而知之者上也。學而知之者次也。又曰。我非生而知之者。好古敏以求之者也。又曰。多聞擇其善者而從之。多見而識之。知之次也。是則學也者。所以求之也。知者何。子曰。不知命。無以爲君子也。不知禮無以立也。不知言無以知人也。又自言五十而知天命。始于知言知禮。終於知天命。知之事也。所謂下學而上達者。詩書執禮則下學也。知天命則上達也。後之儒者。研窮心性。而忽略庸近。是知有上達而不知由于下學。必且虛無愉悅。而無所歸。考證訓詁名物。不務高遠。是知有下學不知有上達。其究瑣屑散亂。無所統紀。聖賢之學。不若是矣。夫詩以治性情。治性情者。明德之學也。書以達政事。達政事者。新民之學也。禮以範視聽言動。克己復禮者。止至善之學也。禮者止也。思無邪。則心正矣。尤

執其中。則天下平矣。動容周旋中禮。則盛德之至矣。然則大學之道。亦豈有外於詩書執禮歟。始乎爲士。終乎爲聖人。此學所以爲大也。其周廟祧考世室考。能發韋元成劉歆鄭康成王肅所未能明。其辭曰。唐虞廟制。書缺有間。夏五殷六。緯書未可據。周禮雖殘缺。遺說猶存。五廟二祧。略可考見。五者。一祖四親。服止五。廟亦止五。先王制禮有節。仁孝無窮。於親盡之祖。限於禮不得不毀。而又不忍遽毀。故五廟外建二祧。使親盡者遷焉。行享嘗之禮。由遷而毀。去事有漸。而仁人孝子之心。亦庶乎可已。故五廟禮之正。二祧仁之至。此周人宗廟之大法也。若夫聖人御世。功德廣遠。天下後世。蒙其德澤。則必有崇祀以爲大報。故有祖宗之祭。周公營洛。建明堂。大合諸侯。祀於太室。所以顯明文武之功德於天下。此周人祖宗之鉅典也。義則親親與尊尊各殊。地則廟祧與明堂又別。自漢承秦後。因陋就簡。禮之大者。未暇講明。迭毀之議。元帝時乃發其端。而合祖宗于宗廟之中。則在當世。無知其非者。上自詔書。下至臣僚建議。皆以祖宗爲不毀之廟。夫周人以后稷爲太祖。而復祖文王者。后稷宗廟之祖。文王明堂之祖。故不嫌二祖。漢以高帝爲太祖。孝文孝武爲世宗。則止一祖。將以高帝準周稷。則祖宗之典。仍有宗而無祖。合並之誤顯矣。論者乃據漢制以揣周制。祖宗之禮不明。廟祧之數亦輾轉不合。後人不求致誤之由。但以五廟七廟。依文發難。夫五廟二祧。禮有正文。不容增減。王制曾子問通稱七廟。非必遂具異義。執此相攻。是知二五而不知十也。五七之數。旣歧。并牽合廟祧爲一。夫祧爲遷廟。必非與寢廟同制。若祧猶是廟。何爲別立此名。循

其通稱忘其殊義。親親之殺。追遠之意。皆失之矣。至乃列世室于昭穆。忘其爲明堂之名。藏遷主于祧。二非太廟合祭之旨。循誦舊說。私心未安。輒伸管穴。爲五廟二祧考。以明周人宗廟之法。爲文武世室考。以明周人祖宗之典。凡舊說之不合者。頗致辯焉。其他如日行諸解。辦王寅旭戴震之誤。禮論治論諸篇。稽古證今。通達政體。文雖不多。然皆獨具神識。未經人道。有補於聖賢經義者。始著於篇。異乎俗儒之連篇累牘。卑庸無裨於世者。君以嘉慶二十三年十二月二十二日。卒於杭州。年五十有一。妻梁氏。子六。兆奎。延棻。延澤。延敬。延凱。延穀。女子子三。延錦。適元之子福。元與君丙午同舉于鄉。已未會試。元副朱文正公爲君座主。又以子女爲姻家。學術行誼。相契最深。故爲傳焉。

安徽巡撫裴山錢公傳

公姓錢。諱楷。浙江嘉興人。生少器宇凝重。伯曾祖文端公見之曰。子其爲我宗之範乎。遂字宗範。後又字裴山。先世本何氏。始祖貴四。于明初坐事戍黔。屬其子裕於錢翁。遂從其姓。四傳至薇。嘉靖朝官禮科給事中。以星變陳言。請斥方士削職。後贈太常寺卿。事載明史。又四傳至贈光祿大夫綸光。爲公高祖。子長卽文端公。次峯。廩貢生。候選訓導。爲公曾祖。以居父喪哀毀卒。旌表節孝。任太夫人撫八歲孤子汝鼎。以文端公蔭監生。需次州同知。爲公祖。生子濬。爲公考。亦以居父喪哀毀卒。是時公八歲。妣程太夫人上事姑。下育孤。貧不繼薪米。質釵珥。盡乃鬻屋賃廬以居。親授公讀。大風雪夜。紡聲書聲。申旦相答也。三世皆

以公貴。贈資政大夫。公幼秉母教。勤學不倦。年十二。補縣學生。乾隆四十二年。選貢入成均。充四庫館謄錄。四十五年。應召試列二等。四十八年癸卯。順天鄉試舉人。四庫書成。議敘知縣。不謁選。五十四年己酉。恩科禮部會試第一。殿試二甲進士第一。選庶吉士。習國書。明年散館。改主事。軍機處行走。補戶部福建司。公性本明敏。銳志精勤。入直常早。散直常遲。承旨撰擬。無不曲當。軍機大臣所傳述者。以故軍機多倚重之。六十年乙卯。充會試同考官。京察一等。記名升江南司員外郎。祖妣屠太夫人卒。以承重憂歸。服除供職。嘉慶三年戊午。充四川鄉試正考官。得士廖宗驪等。秋命提督廣西學政。泗城鎮安二府極邊。例令赴南寧就提學試。遠者行二千餘里。士勞而費重。公奏請歲科連考。以惠貧士。得旨允行。粵士便之。五年升禮部祠祭司郎中。仍留學政任。任滿復命。仍直軍機。逾二年。調刑部安徽司郎中。截取繁缺。知府引見記名。賞四品頂戴。九年京察一等。記名以四五品京堂用。十一年補太常寺少卿。十二年升光祿寺卿。命偕侍郎吳公澂按事河南。十三年又命偕侍郎文公孚按事山西。公遇事鎮靜。而決獄尤不敢忽。不輕用刑。囚或不輸實。跪之庭。連日夜危坐鞫之。卒得其情。歷數省皆然。是年閏五月。授河南布政使。陛辭。上諭以寬嚴相濟。勤慎辦事。勿效近時習尚。因詢家世。公備對。陳敘母教。伏地感泣。上爲動容曰。此賢母也。于是太夫人時俾優諭以勵公焉。既到官。每味爽起。謁巡撫白事。還接見屬吏。退坐小室治文書。紙窗布簾。無器玩之設。食惟一穀。雖一紙一薪。不取給州縣官。核各州縣虧欠銀九十餘萬兩。量爲限制。令分季解。

司官民無擾累。兼護河南巡撫。署河東河道總督。河南食河東鹽者三十二州縣。自嘉慶十一年。山西鹽歸地丁者。復歸商運。限試三年。至限滿而河南鹽價日增。山西巡撫初公彭齡。以河東鹽價隨時低昂。請無庸定價。公奏河南民苦鹽價之增。特待三年滿限。減價食賤。今若不定價。恐奸商藉詞增長。訐訟滋紛。請勅令山西撫臣按乾隆間舊價。酌定限制。違者罪之。庶於不定之中。仍示裁抑之意。十四年十二月。擢廣西巡撫。十五年二月抵任。廣西多客民。依山爲寮。誘土民爲盜。事發遁去。土民獨罹重法。公謂弭盜莫善于保甲。乃酌行舊章。令客戶一體編列。設巡船哨卡。嚴密偵察。委官給以資斧。易服至各要險訪緝。懸重賞爲勸。于是獲逸盜甚衆。弊羣吏先操守。後才能。願嘗謂人才難得。應劭者不少。恕而時存愛惜。造就之意。其才識未充者。隨事教勗。若師弟子然。重刻陳文恭公從政遺規。以爲僚屬法。凡所設施。必陳奏上。嘉勉焉。十二月。調湖北巡撫。十六年二月抵任。會上巡幸五臺。公請陞見。至山西。命閱士子所獻詩賦冊。扈蹕還。至正定。召對十六次。賜賚無算。四月還武昌。有旨來京。以侍郎用。尋諭兼程來京供職。補戶部右侍郎。兼管錢法堂事務。時南陽盜王勝子等。所過刼掠。襄陽毗連南陽。公飭地方文武豫防之。總督馬公慧裕奏請少留。巡撫張公映漢至湖北。公乃交印。公在任兩月。途中奏湖北利弊四事。曰漕米之運。荊州滿營兵食者。宜就近地撥定。沿江洲地。宜悉立契。毋卸報豁。以杜爭端。提督署宜移駐襄陽府。淮鹽價昂。川鹽滯鹽價皆賤。宜減淮鹽價以杜私販。奉旨命湖廣總督等議奏。行至孝感。奉旨署河南巡撫。並諭嚴

捕王勝子等。王勝子者，山東人，與裕州民常幅等乘饑掠人銀米，黨七十餘人，已獲五十二人，而山東亦獲王勝子解河南。公訊治據實奏，奉上諭錢楷奏恩長於南陽匪徒一案，前後具奏，情節與原報不甚相符，辦理亦覺過當等語，所見非是。錢楷著調補工部左侍郎，仍交部察議，旋命巡撫安徽，兼提督銜。戴花翎，離汴之日，百姓老幼遮道送，公諭以循分安業，有泣下者。八月抵安慶時，碭山李家樓河決，宿州當其衝，靈璧界宿，亦被災。泗州當下游，漲不能洩，患尤甚。公乘小舟行巨浸中，以察水勢，攜餅餌飼災民，支席爲廬，凡二千餘所，俾民棲止，先給一月之食。前署河南巡撫時，於孟津諸縣災，飭各屬吏勘明災戶數，後具奏得卽發帑，茲亦如之。奉旨發銀凡四十餘萬兩。公復率僚屬捐養廉爲倡，紳士繼之，或平糶，或賑粥，司事者無剋減冒漏諸弊。所奏正賑加賑日期，及分別被災輕重蠲緩錢糧，皆荷允行。上復以黃河漫口，應如何設法疏導，俾順流入湖爲詢。公復奏：宿州靈璧泗州境內，惟濰河爲減黃總路，然不能容全河之水。李家樓奪溜至七八分，橫流四溢，高出平地，舊河雖深，通亦無益。其入湖處未嘗不順，恐洪湖尙不能容，今漫口未築，水勢未減，各境舊河皆在釜底，固無從疏導，且亦窮於尋探。批答：隨之。明年春，決口合，積水漸退，民得安宅。如公所云，歙縣人張良璧探生，斃嬰女多人，守令前鞠未明，御史入告，命公鞠之。良璧年七十餘，恃無證，陽聾瞶不服。公晝夜親訊，幾二十日，太夫人命禱於城隍神，翌日情盡吐無隱。若有使之者，蒙城人張萬倉子，以父死非罪，入京訴冤，上命公鞠之。原讞張山杜魁等爲盜，山叔父萬倉以拒

捕死山魁等皆獲服爲盜。賊證備具。賊止袍一裘一布二疋。而裘故非實。公委曲于典裘券冊內。察得其情與證。則皆平民。或嘗爲竊者。實非盜。立釋之。其平反活人多類此。安徽穎毫壽鳳等處。俗悍多訟。秀民傳邪教。習拳勇以脅衆。若無爲齋龍華會。顯聖義和拳等。公悉禽治。每決囚。終日不樂。食爲之減。視學廣西。病瘍後。體稍勞輒作。使山西在途背生癰。氣益耗。歷官數省。釐治煩劇。心力日衰。已復得胃疾。漸以不起。嘉慶十七年八月十七日。卒于官舍。年五十三。遺疏入。上諭安徽巡撫錢楷。前在軍機章京上行走多年。供職勤慎。自簡任封圻。歷更數省。辦理地方公務。均能安靜妥協。茲因病溢逝。伊本係孤子。孀母程氏。年逾七旬。其嗣子僅止十歲。深爲可憫。著加恩照巡撫例賞給卹典。該部察例具奏。所有任內一切處分。悉予開復。欽此。尋復諭祭。特賜全葬銀。公舊自孤苦。力學敦行。每念殊眷。不恤勞瘁。儼直機密。筆不輟書。退直讀史賦詩。不自暇逸。蒞外職。益勤案牘。每吉旦焚香告天。願賜豐歲。若將降咎于民者。願降咎于某身。祈晴祈雨雪皆應。所至有秋。生平無疾言遽色。跬步不失矩矱。款曲喻人。不欲立崖岸。意或不同。但陳己見。不輕斥人非。行不效。益自克。服官二十餘年。不親家事。家事則程太夫人自治之。曰。不使兒分心誤國事也。事程太夫人至孝。迎養官署。慕若孺子。所著有緣天書舍詩草六卷。善書。兼工篆隸。又能繪事。蓋公五世祖鶴庵公瑞徵。善畫松石。而高祖妣陳太夫人南樓老人。工寫生。兼善山水。故公畫有家法。恭繪御製詩意。及五臺山圖。寫文殊師利所說經以進。皆蒙睿賞。配陶夫人。側室吳氏。梁氏。皆無子。以同祖弟。

械之子承志爲後。女一。德容。梁氏出。公卒後。太夫人命字元之子祐。太夫人卒于公卒後四年。元與公未第時卽相友善。復以同榜成進士。登堂拜母。知母教及宦跡甚詳。于公歿後。屬姻家。故爲傳焉。

